

# Marcos

## Ure Awu Jesus Rore Jiboe

### Makore Jiboe Bu Bapera Keje

*João Batista Ure Boe Ewie Pao Kurireu Bataruji*

<sup>1</sup> Pao Kurireu o bakaru pemegareu reo. Jesus Cristo jire Pao Kurireu akoino. Onaregedu nure ema. <sup>2-3</sup> Marigudu rugadu imedu Isaías ure Pao Kurireu bataru bu bapera keje. Ainore nou bataru akore:

- Imode itugare utudo uwo boe pemegado nou umode boe ekinorudowu togi.\*
- Itugare kudugodumode boe ewagai boe maereu keje boe ewo awara jetorodo boe eimijera kurireu aregodumode boe etae duji. Mare awara ji karega inagoino. Boe ewo turo pemegado. Dujire inagoino.†

<sup>4</sup> Nou Pao Kurireu makore jiboe jeture pudui rugadu. João Batista jirabodu Pao Kurireu akoino. Pao Kurireu utugare nure ema. Aregodure boe maereu ka. Makore Pao Kurireu bataruji boe ewiagai. Ure boe etao pegodo. Akore: - Tagera ra taro pegareu piji dukeje imode tagao pegodo. Nono Pao Kurireu biagodumode taro pegareu piji.

<sup>5</sup> Boe eture João ae. Emagare tudu tabo toro ae. Etaregodure Judéia moto piji. Etaregodure

---

\* **1:2-3** 1.2-3 Awu bataru padure Malaquias 3.1 keje. † **1:2-3** 1.2-3 Awu bataru padure Isaías 40.3 keje.

Jerusalém ba kurireu piji jamedu. Emeardure João Batista bataruji dukeje emagore turo pegareuji, taiduie tuwo tugera ra nou turo pegareu piji. Nono João Batista ure etao pegodo Jordão Po tada.

<sup>6</sup> João Batista ukudaure camelo buče. Pegaje-jewure tapira biri rema. Okwagere tu kitariga dogei, ropa doge eweguruji tu rugadu. <sup>7-8</sup> Nono ure boe ewie Pao Kurireu bataruji. Akore: – Ia imedu ro kodumode ikoriwu aregodumode iregodaji. Boe pemegareu nure ema, boe kurireu mode ema rugadu. Dukodire ipogurumode ipureduwo ji iro rakakare kodi. Imire ire boe etao pegodo pobo tabo. Emare umode Tuwari tugu boe emeardaeto boe ero pemegawo.

### *João Ure Jesus Ao Pegodo*

<sup>9</sup> Ia meri keje Jesus uture tuwai piji Nazaré ba kurireu piji toro Galiléia moto ka. Nono aregodure João Batista ae toro Jordão Po ka. Nonore João ure Jesus ao pegodo Jordão Po tada.

<sup>10</sup> Nono Jesus ure tudawuje Jordão Po piji dukeje aiwore baruto. Nono barure tuiado dukeje Pao Kurireu Uwari ure turawuje baru piji. Ure tudo nono metugore. Ure tumugudo Jesus keje.

<sup>11</sup> Nono Pao Kurireu makore baru piji. Akore: – Itonaregedu nure aki. Imeardu kurire ai rugadu. Are iagaredo i rugadu.

<sup>12</sup> Dukeje Pao Kurireu Uwari ure Jesus utudo toro boe maereu ka. <sup>13</sup> Meri oto padure quarenta Jesusji nono. Bope doge eimijera Satanás aregodure ae nono. Aidure tuwo turokogado Jesusji tuwo Jesus meardae pegado nono tumeardae

mogadure. Barege pegareuge emagare nono Jesus apo. Mare Pao Kurireu utugarege baru tadawuge etaregodure ae. Etu pemegare Jesusji rugadu.

### *Jesus Makore Uwogureuge Ewagai*

<sup>14</sup> Boe eimijera pegareu ure João Batista tugu baiçoreuto. Jesus uture Galiléia moto ka. Nonore makore Pao Kurireu bataru pemegareuji boe ewiagai. <sup>15</sup> Akore: - Kuri aino Pao Kurireu umode boe eimijera kurireudo imi rugadu. Ča tagera ra taro pegareu piji. Tameartorudo Pao Kurireu bataruji rugadu.

<sup>16</sup> Jesus merure pobo maereu okwaji. Nou pobo maereu iere Galiléia. Nono Jesus jordure imei. Ere pobe. Ia iere Simão. Uwie iere André. Ewogure tuwuge tabo. Ere kare ewido.

<sup>17</sup> Jesus makore etae. Akore: - Mato tagoduwo itabo. Imode tarduwado tawoguwo ime ewagai. Mare tawogu ji karega inagoino. Tamode boe emeartorudo Pao Kurireuji. Dujire inagoino.

<sup>18</sup> Nono ere tugera ra tuwogu piji tači je. Eture Jesus apo rugadu tumaragodae piji.

<sup>19</sup> Jesus kodure nou pobo maereu okwaji kimo. Nono jordure ia imei. Ere pobe. Ia iere Tiago. Nou uwie imedu iere João. Etuo iere Zebedeu. Eragojere to ika kurireu tada. Emaragodure tuwugeji tuwo pemegado. <sup>20</sup> Jesus jordure ei dukeje makore etae. Dukodire eture tuo piji, to ika kurireu piji, tudugarege epiji tugoduwo Jesus apo.

### *Bope Meture Imedu Tada*

<sup>21</sup> Jesus aregodure Cafarnaum ba kurireu ka ture jorduwadowuge ebo. Sábado meri keje Jesus uture nou Judeu doge ere bato puiwu bai ka. Nonore ure boe erduwado. <sup>22</sup> Boe emeardure Jesus bataruji dukeje nono eiamedu boe eku kidure rugadu nou Jesus makore jiboeji. Jesus makore jiboe ukare nono nou boe eimijerage jorduware Judeu doge eno bakaru jiwuge ewadaru mogadure. Jesus mako pemegare mako jetorore rugadu dukodire boe erduware Pao Kurireu bataru remawu jire Jesus akoino duji.

<sup>23</sup> Nono ia bope meture tadawu imedu kudugodure. Nou bope uwari emare akoino. <sup>24</sup> Akore: – Nazaré pijiwu Jesus nure aki rugadu. Nuba aro mode čei? Amode čedagedudo na? Čerduware ai. Aro pega bokware. Pao Kurireu ure akarego mato tuwadaru pemegareu tabo boe ewagai rugadu!

<sup>25</sup> Nono Jesus makore nou bope bataru jipagi. Akore: – Amagokaba boeji pugeje. Atawuje awu imedu piji.

<sup>26</sup> Nou bope uwari ure nou imedu magadudo ure kudugodudo jamedu. Dukejere ure tudawuje nou imedu piji. <sup>27</sup> Boe erore ta je Jesus rore aino duji. Dukodire emagore pui. Eгоре: – Nuba awu Jesus rore? Ure nou bope uwari utudo tači awu imedu piji. Nou bope meartorure awu Jesus bataruji. Marigudu čerduwakare čerowo aino.

<sup>28</sup> Dukodire boe ere nou Galiléia moto kejewuge boe eiamedu boe ewie Jesus rore jiboeji makore jiboeji jamedu.

*Jesus Ure Boe Epemegago*

<sup>29</sup> Jesus uture nou Judeu doge ere bato puiwu bai piji. Uture nou ture jorduwadowugebo. Tiago uture apo. João uture apo jamedu. Eture Simão‡, André ewai ka. <sup>30</sup> Simão uçarugo kogodure. Biri urure. Padure nono tuba keje. Jesus aregodure dukeje boe ere bie. <sup>31</sup> Dukodire uture ae. Ure tugeragu ieraji. Ure rakojedu dukeje nou biri uru akedure tači je. Pemegagodure pugeje. Dukodire ure eke pemegado.

<sup>32</sup> Boečoji boe etaregodure Jesus ae kogodureugebo, bope doge emedure tadawugebo jamedu. <sup>33</sup> Nou mugure ba kurireu kejewuge eiamedu boe etaregodure Jesus ae. <sup>34</sup> Jesus ure nou kogodureuge epemegago. Ure bope doge etawuje boe epiji tuwo etudo epiji rugadu. Nou bope doge erduware Jesusji dukodire Jesus ure nou bope doge emago bokwado.

### *Jesus Makore Pao Kurireu Bataruji Galiléia Moto Keje*

<sup>35</sup> Nou barogwato boedugu kimoto Jesus ure tudawuje. Uture nou bai piji. Uture nou ba kurireu piji toro ia boe maereu ka tumagowo Tuo bagai baruto. <sup>36</sup> Nono Simão uture tumedagebo tiemaru tabo bagai. <sup>37</sup> Nono erdure ji dukeje egore: – Boe emarure awagai tumearduwo awadaruji pugeje.

<sup>38</sup> Mare Jesus makore ei. Akore: – Emeardure iwadaruji marigudu dukodire padumode ia boe etae pugeje. Imagomode Iogwa Kurireu bataruji ewiagai jamedu. Dukodire itaregodure baru piji.

---

‡ **1:29** 1.29 Simão iere Pedro jamedu.

<sup>39</sup> Dukodire uture Galiléia moto jamedu boe parugajeje tumagowo Tuo bataruji boe ewiagai. Makore boei ere bato puiwu bai tada. Ure bope doge etawuje boe epiji jamedu.

### *Jesus Ure Imedu Pemegago Pugeje*

<sup>40</sup> Ia imedu kogodureu aregodure Jesus ae pugeje. Nou kogodae ure biri pegado rugadu. Aregodure Jesus ae dukeje ure tubu jodo moto keje jokorai. Okwamagudure Jesusji uwo tugera maku pudai rugadu. Akore: - Aragare rugadu awo ipemegago. Mare akaidumode dukeje amode ipemegago.

<sup>41</sup> Jesus okudugodure apo. Dukodire ure tugera bu nou imedu keje. Akore: - Uu. Itaidure. Ča. Apemegare rugadu.

<sup>42</sup> Nono nou imedu biri pemegagodure tači je rugadu. <sup>43-44</sup> Nono Jesus ure tumago rakado ji ukawo boe ewie nou turore jiboeji. Akore: - Amagokaba awu irore jiboeji boe ewiagai. Atudo kuri nou Pao Kurireu uwai ka. Nonore amode nou ure Judeu doge enomea maku Pao Kurireu aiwu imedu jordudo awiriji. Jordumode awiri pemegagodure duji rugadu. Nono amode nou Moisés makore jiwu mori maku ai rugadu nono paro mogadure. Nono nou ure boe enomea maku Pao Kurireu aiwu imedu umode nou are maku pudaiwu mori maku Pao Kurireu ai rugadu. Dukodire boe eiamedu boe erduwamode apemegagodure duji.

Jesus makore aino tuwo nou imedu utudo pugeje.

<sup>45</sup> Nou imedu uture mare meartorukare Jesus makore pudui jiboeji. Makore boe eiamedu boe ewiagai nuba Jesus rore pudui duji. Nono boe eiamedu boe etaidure tumagowo Jesusji. Dukodire Jesus roiwakare tuduwo boe eda ka. Rakojere boe maereu keje. Mare nou moto kejewu boe emarure Jesus bagai tuiorduwo ji.

## 2

### *Jesus Ure Imedu Pogora Pegareu Pemegago*

<sup>1</sup> Ia meri keje Jesus uture tuibagi Cafarnaum ba kurireu ka. Aregodure dukeje boe ere pu rugadu boe bie aregodure duji. <sup>2</sup> Dukodire boe eture nou Jesus rakojere tadawu bai ka. Emagare. Emagare rugadu. Ere turemo nou baito mare nou bai čekare nou boe dogei. Dukodire iage edure bawadu keje. Jesus makore Pao Kurireu bataruji ewiagai. <sup>3</sup> Nono ia ime etaregodure. Enodo padure pobe puibiji. Enoredure ia imedu pogora pegareu apo. Etaidure taregoduwo apo Jesus ae. <sup>4</sup> Mare boe emagare nono Jesus apo dukodire eroiwakare tubureduwo Jesusji. Dukodire erudure nou bai ao ka nou imedu pogora pegareu apo. Nono ere nou bai ao porodo. Dukejere ere nou imedu pogora pegareu rawuje nou bai ao piji moto ka bukigu tabo. Nou imedu padure kodo keje. Ere bukigu kogudo nou imedu padure kejewu kodo tabo. Dutabore ere rawuje moto ka Jesus jokora ka. <sup>5</sup> Jesus jordure emeartorure pudui duji kodire etaregodure aino nou imedu apo pudae duji. Dukodire makore nou imedu pogora pegareuji. Akore: – Me. Ire

aro pegareu jamedu boe barigu apiji dukodire Pao Kurireu biagodumode aro pegare jiboe piji.

<sup>6</sup> Jorduware Judeu doge eno bakaru jiwuge edure nono nou boe dogebo. Ewipagare Jesus bataruji dukeje emeardaere tudada. <sup>7</sup> Egore: – Awu Jesus makore jiboe ukare turugadu. Unure tudo nono Pao Kurireure. Mare pagare akoino. Dukodire mako peganure Pao Kurireuji. Tu Pao Kurireu umode boe ero pegareu barigu boe epiji tuwiagoduwo ero pegareu piji.

<sup>8</sup> Jesus jorduware emeardaere jiboeji. Dukodire makore ei. Akore: – Kočare tameardae pegare imagore jiboeji. <sup>9</sup> Boe jokodu. Boe emodukare boe ero pegareu barigu epiji rugadu. Mare boe emodukare awu imedu pogora pegareu pemegago jamedu. Emodukare pemegago rugadu. Tu Pao Kurireu umode pemegago. Tu Pao Kurireu umode boe ero pegareu barigu boe epiji tuwiagoduwo ero pegareu piji rugadu. <sup>10</sup> Dukodire imode awu imedu pogora pegareu pemegago dukeje tarduwamode Imedu Onaregedu nure imi duji. Dukodire imode tarduwado iragare iwo boe ero pegareu barigu epiji duji ewarigudukawo bope doge eda kejewu joru pegareuto rugadu.

Ainore Jesus akore nou boe eimijeragei. Nono Jesus makore nou imedu pogora pegareuji. <sup>11</sup> Akore: – Me. Aragojedo. Akeragu akudau kodoji atuwo tabo aibagi awai ka.

<sup>12</sup> Boe etaiwore nou imedu pogora pegareuji. Ča ure turagojedo rugadu. Ure tugeragu tugudau kodoji. Dukejere uture tabo pugeje. Meru pegakare. Boe eiamedu boe eku kidugodure nou



rore aino duji. Dukodire emago pemegare Pao Kurireuji. Eгоре: – Marigudu čerdukare awu inoduji rugadu.

*Jesus Makore Levi Bagai*

<sup>13</sup> Jesus uture tuibagi pobo maereu okwa ka. Nou pobo maereu iere Galiléia. Nou boe etaregodure nono ae pugeje. Emagare. Dukejere Jesus ure erduwado Pao Kurireu bataruji.

<sup>14</sup> Merure pobo okwaji dukeje jordure imposto diero makudure aiwu imeduji. Nou imedu iere Levi. Alfeu onaregedu nure ema. Mugure nono ira keje. Nonore ure tugeragu dieroji boe epiji enoe imposto moriče tuwo maku boe eimijera kurireu ai.\* Nou imedu maragodae nure nou inoduče. Jesus makore ji. Akore: – Ako itabo.

Ča Levi ure turagojedo. Uture Jesus apo rugadu.

<sup>15</sup> Nou boečoji eragojere Levi uwai tada togwagewo. Jesus ure jorduwadowuge edure nono jamedu. Ia kodure Jesus apowuge emagare nono. Nou imposto mori makudure aiwuge edure nono jamedu. Boe eгоре ro pegareuge enuie emage. Ia boe etaidukare jiwuge eragojere nono Jesus apo jamedu. Nou boe eiamedu boe emugure nono togwage tabo Jesus apo. <sup>16</sup> Dukejere ia fariseu doge etaregodure jamedu. Jorduware Judeu doge eno bakaru jiwuge nure emage. Erdure Jesus okwagere nou ro pegareugebo duji. Etaidukare nou ro pegareugei dukodire emagore nou Jesus ure jorduwadowugei. Eгоре: – Kočare

---

\* **2:14** 2.14 Brae eno tabo brae eгоре “imposto” aino nou moriji.

Jesus okwagere awu ro pegareugebo? Ukare turugadu!

<sup>17</sup> Jesus meardure nou fariseu doge egoino duji. Dukodire makore ei. Akore: - Jorubo kuru epa jemarumodukare kogodukareuge ewagai. Mare kogodureuge ewagaire jemarumode tuwo epemegago. Ire nono nou jorubo kuru epa ro mogadure. Mare jorubo kuru epa ji karega inagoino. Itaregodure woe mare ro pemegareuge ewagai karega iroino. Ro pegareuge ewagaire iroino ewo tugera ra turo pegareu piji. Dujire inagoino.

*Boe Etaidure Jesus Okwage Bokwawo Ia Meri Keje*

<sup>18</sup> Ia meri keje aidure João Batista bataru jiwuge enogwage bokware tumagowo Pao Kurireu bagai baruto nou meriji. Ainore Fariseu doge erore jamedu. Ia boe etaregodure Jesus ae dukeje enarare ji. Egore: - João Batista ure jorduwadowuge enogwagekare awu meriji tumagowo Pao Kurireu bagai baruto awu meriji. Fariseu doge ere jorduwadowuge erore aino awu meriji jamedu. Kodiba are jorduwadowuge enogwagekare tumagowo Pao Kurireu bagai baruto awu meriji?

<sup>19</sup> Jesus akore: - Ire nono uwiremodewu imedu mogadure. Mare uwiremodewu karega. Boe etuwirere dukeje ere tuwadae towuje. Nou ewadae kejere boe enogwagemode rugadu. Ewadae reno. Ekiarigodumodukare nou meriji.  
<sup>20</sup> Mare ewadae akedure dukeje uwirereu imedu utumode epiji toreduje apo. Dukejere care boe

emode ia meri tawuje togwagekawo nou meriji tumagowo Pao Kurireu bagai baruto nou meriji. Ire nono nou uwiremodewu imedu mogadure. Mare uwiremodewu imedu ji karega inagoino. Ire inagoino. Ire irawuje baru piji mato boe ewagai. Mare ia meri keje itumode nou boe epiji baruto dukeje boe emode nou meri tawuje togwagekawo nou meriji tumagowo Pao Kurireu bagai baruto nou meri keje. Dujire inagoino. <sup>21</sup> Boe ekudau areia pegagodureu umode tuwowuje. Mare boe emodukare tugudau areia maiwu kado tuwo nou tugudau pegagodureu poro miwuje tabo. Boe eromode aino dukeje nou ekudau areia maiwu gigirimode. Dukodire umode tuwowuje nou boe ekudau areia pegagodureu piji kuri je pugeje. Dukodire nou ekudau areia pegagodureu umode tuwowuje ja je. Nono nou poro kodumode tugori. <sup>22</sup> Boe ere tapira biri maiwu pemegado nou tuge vinho kuru maiwu jače. Mare emode vinho kuru maiwu tugu tapira biri čodureuto dukeje nou tapira biri čodureu umode tuwowuje. Nono nou vinho kuru umode tuwarigu nou tapira biri čodureu piji rugadu. Dukodire boe ekare tuge vinho kuru maiwu tugu tapira biri čodureuto. Ere tuge vinho kuru maiwu tugu tapira biri maiwuto tu tu je.

Ainore Jesus akore. Mare areia ji karega akoino. Vinho kuru ji karega akoino. Tuwadaru maiwu jire Jesus akoino.

*Boe Etaidure Tuiorduwawo Nuba Turomode  
Sábado Meriji*

<sup>23</sup> Jesus merure boepa oiagi sábadu meriji. Trigo ure nou boepa tada. Ure jorduwadowuge ekodure apo. Nono nou Jesus ure jorduwadowuge ere tugeragu trigo enariji tuwo ko. <sup>24</sup> Fariseu doge emeardae pegare nou inoduji. Dukodire emagore Jesusji. Egore: - Akaiwodo. Judeu doge nure pagi. Pamaragodumodukare sábadu meriji. Dukodire pamodukare pageragu trigoji sábadu meri keje. Mare nou are jorduwadowuge ere tugeragu trigoji. Ukare turugadu!

Mare erduwakare. Boe ewo tugeragu ia tuge roguji ji karega Pao Kurireu akoino boe emaragodukaiago sábadu meriji.

<sup>25</sup> Jesus akore: - Tarduwakare Pao Kurireu bataruji! Dukodire tarduwakare Pao Kurireu meardae remawuji. Tarduwamode Pao Kurireu meardae remawuji dukeje tamago pegamodukare čeroino duji. Marigudu Judeu doge eimijera kurireu Davi rore jiboe padure Pao Kurireu bataru keje. Dujire tarduwakare. Nou Davi uke boeire ji. Utugarege tugobaigarege eke boeire ei jamedu. <sup>26</sup> Dukodire ure turemo Pao Kurireu uwaito. Okwagere boe ere maku Pao Kurireu aiwu amireuji. Nou joruji nou ure Judeu doge enomea maku Pao Kurireu aiwuge eimijera kurireu iere Abiatar. Pao Kurireu ure turo maku pawobe Judeu doge etai. Makore ei ekawo nou amireu ko. Tu nou ure boe enomea maku Pao Kurireu aiwuge emode nou Pao Kurireu uwai tadawu amireu kowuje. Mare Davi ure kowuje. Ure ia maku tudugarege etai ewo kowuje jamedu. <sup>27-28</sup> Imedu Onaregedu

nure imi. Imire imode boe erduwado rugadu nuba boe eromode sábadó meri keje. Dukodire imagomode aino tai. Pao Kurireu ure boe ero maku boe etai erowo aino sábadó meriji tu tu je. Mare paga karega boe pemegawo boei. Boe pegawo boei karega.

### 3

#### *Imedu Iera Pegare*

<sup>1</sup> Jesus uture Judeu doge ere bato puiwu bai ka pugeje sábadó meri keje. Ia imedu rakoje nono. Iera pegare. Ierare tudorido puapo. <sup>2</sup> Ia boe erdu pegare Jesusji. Edure nono jamedu. Dukodire etaiwore Jesus ia ro pegamode dubagai. Judeu doge eromodukare ia turore jiboeji sábadó meri keje. Dukodire etaidukare boe eiogowo boei sábadó meri keje. Mare Jesus umode nou imedu iera pemegago nou meriji dukodire nou boe erdu pegamode Jesus rore aino duji. <sup>3</sup> Jesus makore nou imedu iera pegareuji. Akore: – Aragojedo. Mato itae woe boe etoia ka.

<sup>4</sup> Nono Jesus unarare nouia boei. Akore: – Nuba pago bakaru akore paromoduie sábadó meri keje? Paro pegamoduie boei kana? Paro pemegamoduie boei kana? Pamode boe ekinorudo boe pegareu piji sábadó meri keje kana? Pamode boe ewarigu boe pegareuto sábadó meri keje kana?

Nou boe emagokare boeji. <sup>5</sup> Jesus korigodure ei. Aiwore ei. Etaidukare tumearduwo Jesus makore jiboeji emeardae pegare kodi. Mare Jesus okudugodure ebo jamedu. Dukejere Jesus

makore nou imedu iera pegareuji. Akore: -  
Akerá raido itae.

Nono nou imedu ure tugera raido ae. Čare iera pemegagodure tači je. <sup>6</sup> Mare fariseu doge eture nou bai piji tumara tabo boe korire ei kodi. Erdu pegare Jesus rore aino duji sábadó meri keje. Sábado meriji emaragodumodukare eromodukare ia turore jiboeji. Dukodire eko-rigodure Jesusji. Ere bato pui ia meartorure Herodes bataru jiwu imebo. Emagore pui tuwo ia tumeardae tawuje tuwo Jesus bito.

### *Boe Emagare Pobo Maereu Po Okwai*

<sup>7</sup> Jesus uture ture jorduwardowugebo pobo maereu okwa ka. Nou pobo maereu iere Galiléia Po. Aidure Jesus bataru jiwuge eture Jesus rekodaji pugeje. Emagare rugadu. <sup>8</sup> Galiléia kejewugere. Judéia kejewugere. Iduméia kejewugere. Tiro ba kurireu kejewugere. Sidom ba kurireu kejewugere. Ia Jordão Po bakowu kejewuge ekurugodure Jordão Po kajeje taregoduwo Jesus ae jamedu. Emeardure Jesus rore jiboeji dukodire nou boe etaregodure tuiorduwo Jesusji. <sup>9</sup> Boe ere tuiodo puwugeje pu otodai dukodire Jesus roiwakare tumago pemegawo ei. Dukodire makore ture jorduwardowugei ewo ia ika kurireu po barigu tuwo taredo to. Ewo tuiodo ika keje pobo oiado. Nono akuamode tumago pemegawo nou boei nou ika piji. <sup>10</sup> Jesus ure kogodureuge epemegago. Emagare rugadu. Mare ia kogodureuge kimore. Etaidure tuwo tuburedo Jesusji tuwo tugera jetudo Jesus ukudau areiaji tubemegagoduwo. <sup>11</sup> Bope doge emedure iage etada.

Etaregodure Jesus ae dukeje ere tuwududo moto keje tugudu tabo Jesus jokorai. Eгоре: – Pao Kurireu Onaregedu nure aki!

<sup>12</sup> Jesus mako rakare nou bope doge ewadaru jipagi emagokawo nou inoduji boe ewiagai.

*Jesus Ure Tugeragu Tumode Jorduwadowugei Tuwo Etudo Tuwadaru Tabo Boe Ewagai*

<sup>13</sup> Nono Jesus ruture ia tori ao ka. Nono makore taidure jiwuge boe ewagai. Nono etaregodure ae. <sup>14</sup> Jesus ure tugeragu jiwuge ime enodo padure kejewugere doze. Ure tugie maku etai. Akore: – Uture iwadaru tabowu boe nure tagi. Ire ikeragu tai taragojewo itabo. Imode tarduwado tamagowo iboeji boe ewiagai.

<sup>15</sup> Imode taragado tawo bope doge etawuje boe epiji.

<sup>16</sup> Ainore nou Jesus ure tugeragu jiwuge ekiere. Ia iere Simão. (Jesus ure awu Simão iedo Pedro)

<sup>17</sup> Ia iere Tiago. Zebedeu onaregedu nure ema. Ia iere João. Tiago uwie nure ema. (Jesus ure nou ime pobedu doge ekiedo Boanerges. Ewadaru tabo eгоре aino: “Boeiaruru ore nure emage.”) <sup>18</sup> Ia iere André. Ia iere Filipe. Ia iere Bartolomeu. Ia iere Mateus. Ia iere Tomé. Ia iere Tiago. Nou Tiago Alfeu onaregedu nure ema. Ia iere Tadeu. Ia iere Simão Zelote. <sup>19</sup> Ia imedu iere Judas Iscariotes. Emare umode Jesus maku boe eimijerage pegareuge etai.

*Boe Emago Pegare Jesus Rore jiboeji*

<sup>20</sup> Nono Jesus ure turemo ia baito. Boe emagare nono apo pugeje. Dukodire Jesus roiwakare togwagewo ture jorduwadowugebo. <sup>21</sup> Jesus

uwobe emeardure nou inoduji dukeje etaidure tuwo Jesus utudo nou boe doge epiji. Boe egore Jesus aora bai baie kodi.

<sup>22</sup> Ia jorduware Judeu doge eno bakaru jiwuge etaregodure Jerusalém ba kurireu piji. Erdu pegare Jesus rore jiboeji dukodire emago pegare ji. Egore: – Bope doge eimijera iere Belzebu\*. Emare meture nou Jesus tada. Emare ure turaga maku Jesus ai Jesus uwo bope doge etawuje boe epiji.

<sup>23</sup> Dukodire Jesus makore ewagai tumagowo ewadaru jipagi. Akore: – Bope doge eimijera iere Satanás jamedu. Umodukare tudawuje boe epiji tugina. Mare ia imedu ro rakareu koiare umode tawuje boe epiji. <sup>24</sup> Ia boe epokare puapo dukeje erugodure pui. Dukeje eraga akedumode epiji kuri je. <sup>25</sup> Boe erugodumode tuwobei dukeje emode tugera ra pubiji rugadu. Dukodire eraga bokwamode rugadu. <sup>26</sup> Mare meartorure Satanás jiwugeire inagoino. Epomodukare puapo dukeje eragamodukare pugeje. Boe pegamode ei rugadu. Etagedumode rugadu. <sup>27</sup> Ča iwogureu aidure tuwo turemo ia tugobaigare uwaito tuwo tugeragu nou tugobaigare ia oeji. Mare umode nou tugobaigare kogudo bukigu tabo boetaji. Nono umode tugeragu nou tugobaigare oeji rugadu tuduwo tabo rugadu.

<sup>28</sup> – Boe jokodu jire inagoino. Boe etaidukare turo pegareuji pugeje dukeje Pao Kurireu biagodumode nou ero pegareu piji. Emago peg-

---

\* **3:22** 3.22 Bope doge eimijera kurireu iere pobetu je. Iere Satanás. Iere Belzebu jamedu.



amode Pao Kurireuji. Mare ekiarigodumode nou tuwadaru pegareuji dukeje Pao Kurireu biagodumode ewadaru pegareu piji. <sup>29</sup> Mare ia boe emago pegamode Pao Kurireu Uwariji dukeje Pao Kurireu biagodumodukare nou ewadaru pegareu piji rugadu. Nou bataru metumode nou boebo ji rugadu. Du akedumodukare rugadu. Dukodire Pao Kurireu biagodumodukare nou inodu piji.

<sup>30</sup> Nou boe egore bope uwari metuie Jesus tada dukodire Jesus akoino ei.

### *Jesus Uče, Uwiemage Etaregodure*

<sup>31</sup> Jesus uče, uwiemage etaregodure bagai. Eragojere bawadu keje. Emagore Jesus bagai toro nou baito. <sup>32</sup> Boe emagare nou bai tada Jesus apo. Emagore Jesusji. Egore: - Akaiwodo. Ače, awiemage etaregodure. Epagare awagai bawadu keje.

<sup>33-35</sup> Jesus makore ewadaru jipagi. Akore: - Imode tawie ioguduba nure mugače, ioguduba nure iwobeče.

Nono Jesus aiwore nou mugure pudabowugei. Akore: - Awu boe ere nono iwobe mogadure. Meartorure Pao Kurireu meardae jiwu areme ime ere nono iwobe emogadure rugadu. Ere nono iwie mage emogadure rugadu. Ere nono muga mage emogadure rugadu.

## 4

### *Boepa Tadaboe Jiwu Bakaruo Reo*

<sup>1</sup> Nono Jesus uture nou Galiléia pobo maereu okwa ka pugeje. Boe ere bato pui nono tumearduwo Jesus bataruji pugeje. Emagare rugadu. Dukodire Jesus ure taredo ia ika kurireuto. Nou ika kurireu padure nono pobo tada. Nou boe edure pobo okwai tumearduwo Jesus bataruji. Jesus ure tumugudo nou ika kurireu ja tada.

<sup>2</sup> Nono Jesus makore ia bakaruji nou boe ewiagai tuwo nou boe erduwado nouia Pao Kurireu meardaeji.

<sup>3</sup> Akore: – Tawiapaga pemegado iwadaruji. Ia meri keje imedu uture to boepato tuwo boe tugu mototo. <sup>4</sup> Ure boe a roto ja ja moto joki to boepa tada. Ia a buture awara okwaji. Dukodire kiebarege ere nou buture awara okwa jiwu boe a rugadu kowuje. <sup>5</sup> Ia a buture toriguru tada. Boture kuri je mare moto pegare ji. <sup>6</sup> Dukodire boeru jeture ji dukejere nou boeru ure nou butureboe bito kuri je rugadu. U kwa bokware kodi. Moto pegare kodi. <sup>7</sup> Ia a buture botoguru tada. Botoguru boture tabo jamedu mare botoguru ure bito. Dukodire nou buture botoguru tadawu boe a ričodukare pemegakare jamedu. <sup>8</sup> Mare ia a buture moto pemegareu keje. Ere tuguwu sacu ure mitotu je. Botu pemegare, ričodu pemegare, enari kurire rugadu. Kidure dukeje ere rawuje čiwu piji. Ere a rawuje tuwo tugu sacuto. Nou sacu doge emagare. Parduwakare nuba nou ere korau sacu dogere. Ere cem, ere sessenta, ere trinta rabodu nou boe a tabo. Tawiapaga pemegado awu iwadaruji tarduwawo kaba jiba inagoino tai.

<sup>9</sup> Jesus ure nou bakaru akedudo dukeje makore

ei pugeje. Akore: – Tawiapaga pemegado iwadaruji.

*Jesus Ure Boe Ewie Kodiba Tumagore Bakaruji Boe Ewiagai*

<sup>10</sup> Jesus uture nou boe epiji ture jorduwad-owugebo. Mare iage etaidure tuiorduawo kaboba jiba nou bakaru akoino. Dukodire eture rekodaji tumeardu pemegawo kaba jiba akoino.

<sup>11</sup> Jesus makore ei. Akore: – Ireadodure bakaruji iwo boe erduwado nouia Pao Kurireu meardaeji. Mare paga karega. Ireadodure bakaruji aino Pao Kurireu uwo tarduwado meture pudabowu tumeardae boeji boe ewo tugimijerado tu ema. Mare meartorukare Pao Kurireu jiwuge emear-dumode imagore jiwu bakaruji mare emodukare boe pa nou bakaruji. <sup>12</sup> Dukodire:

– Etaiwomode rugadu mare erdumodukare boeji;

Ewiapagamode mare erduwamodukare boeji.

Mare erduwamode dukeje emode tumagu Pao Kurireu ai.

Dukejere Pao Kurireu biagodumode nou ero pegareu boe piji.\*

*Jesus Ure Ture Jorduwadowuge Erduwado Tumagore Jiboeji*

<sup>13</sup> Nono Jesus unarare ture jorduwadowugei. Akore: – Tarduware awu inagoino jiwu bakaruji? Nuba taromode tarduwawo awu bakaruji?

---

\* **4:12** 4.12 Awu bataru padure Isaiás 6.9-10 keje.

14 Nono Jesus ure erduwado nou bakaruji. Akore: - Boe eire inagoino. Pao Kurireu bataru jire inagoino jamedu. 15 Pao Kurireu o bataru ure nono nou boe a mogadure. Mare boe a ji karega inagoino. Pao Kurireu bataru aregodumode boe etae. Nono boe emeardumode Pao Kurireu bataruji. Dujire inagoino. Boe emeardumode Pao Kurireu bataruji mare bope doge eimijera umode nou boe ewiagodudo nou tumeardure jiwu Pao Kurireu bataru piji. Dukodire emeartorumodukare ji rugadu. Dujire inagoino. 16-17 Ia boe emeardumode Pao Kurireu bataruji pugeje. Nono nou boe emode nono nou boture toriguru tadawu boe a mogadure. Mare boe a ji karega inagoino. Boe eire inagoino. Nou boe eragamodukare tumeartoru raiwo Pao Kurireuji. Dujire inagoino. Emode tugeragu Pao Kurireu bataruji tiagare tabo mare emeartoru raimodukare ji. Dujire inagoino. 18 Ia boe emeardumode Pao Kurireu bataruji pugeje. Awu boe emode nono nou boture botoguru tadawu boe a mogadure. Botoguru umode boe pegado ji umode bito. Mare boture botoguru tadawu boe a ji karega inagoino. Boe eire inagoino. Nou boe emeardumode Pao Kurireu bataruji. Etaidure tumeartoruwo ji. Dujire inagoino. 19 Mare emororamagadumode tu tumeardae boeji kuri je. Emeardaere tu pudui tuwo to diero kurido. Dujire inagoino. Etaidumode tu taidure ji-boeji. Emeardaere nou taidure jiboe umode tuginorudo boe pegareu piji mare pagatu je. Dukodire emode tugera ra Pao Kurireu bataru piji. Dujire inagoino. 20 Mare ia boe emear-

dumode Pao Kurireu bataruji dukeje emeartorumode ji rugadu. Dukodire epemegamode rugadu nono nou boture moto pemegareu boe a mogadure. Mare boture moto pemegareu kejewu boe a ji karega inagoino. Boe eire inagoino. Nou boe emeardumode Pao Kurireu bataruji nono emeartorumode ji rugadu. Dujire inagoino. Emodukare tugera ra tumeartorure jitu piji rugadu jii toro rugadu. Dujire inagoino.

*Boe Emodukare Pori Bu Jorugu Aogeje*

<sup>21</sup> Jesus makore kimo. Akore: – Boe emode pori bu lamparina aogeje dukeje urugumodukare. Boe emode jorugu mugudo tuba kuda dukeje urugumodukare jamedu. Mare boe emode lamparina urugu bararedo, uruguwo pudui. <sup>22</sup> Ča boe etaidumode tuwo turo pegareu biado boe epiji. Mare Pao Kurireu jorduware marigudu ero pegareuji. Dukodire boe erduwamode nou ero pegareuji jamedu. <sup>23</sup> Taipaga pemegado iwadaruji.

<sup>24</sup> Nono Jesus makore ei pugeje. Akore: – Taipaga pemegado tameardure jiboeji. Tagaiwomode boe eroji ero pegamode dubagai dukeje Pao Kurireu aiwomode taro pegareu bagai jamedu. Tagaidumode boe pegawo boei ero pegareu moriče dukeje Pao Kurireu umode boe pegado tai rugadu taro pegareu moriče. <sup>25</sup> Boe erduware Pao Kurireu bataruji. Etaidure tumeartoruwo ji dukeje Pao Kurireu umode erduwa kurido pudui emeartoruwo pudui rugadu. Mare ia boe etaidumodukare tumeartoruwo tuorduware jiwu Pao Kurireu bataruji dukeje Pao

Kurireu umode erduwa bokwado tuwadaruji. Emeardaere tuorduwaie rugadu mare pagatu je.

*Boe A Boture Dukodiwu Bakaru Reo*

<sup>26</sup> Jesus makore boei pugeje. Akore: - Boe eimijera kurireu nure Pao Kurireuče rugadu. Meartorure jiwuge emagamode rugadu. Mare boe erduwakare meartorumode jiwugei meartorumodukare jiwugei jamedu. Imode tarduwado nou inoduji bakaru tabo. Imedu ure boe a tugu mototo mare jorduwakare botumodewugei botumodukareugei jamedu. Ure boe a roto ja ja moto joki. <sup>27</sup> Nono nudure boečoji. Nou barogwato ure tie bu. Ure tuguwu boe a boture mare imedu jordukare ji mototo. Jorduwakare nuba nou boe a rore tuwoduwo. <sup>28</sup> Moto koiare ure nou boe a botudo. Boture dukeje ričodure. Ričore dukeje enarire. Enari kurire. <sup>29</sup> Imedu pagare kuroduwo. Kurodumode dukeje ure kado tariga tabo. Inagore imedu uie boe a tugu mototo. Boere nono nou boe a mogadure. Mare boe a ji karega inagoino. Boe eire inagoino. Ia boe emeartorumode Pao Kurireuji rugadu. Iage emeartorumodukare ji jamedu.

*Mostarda A Boture*

<sup>30</sup> Jesus makore boei pugeje. Akore: - Itaidure iwo tarduwado nuba Pao Kurireu utugarege ere. Pao Kurireu utugarege emagakare mare ia meri keje Pao Kurireu utugarege emagagodumode rugadu. Ireadoduwo ia bakaruji tawiagai. <sup>31</sup> Ia imedu ure ia mostarda a tugu to boepato. Mostarda a kurikare rugadu. Boe a jamedu boe kurire nou mostarda a kori. Imedu ure tugu to

boepato. <sup>32</sup> Nono ia meri keje boture. Ričodure rugadu. Nono iku kurire nou boe emode tugu to boepa tadaboe iku jamedu boe kori. Kiebarege ere tumugudo keje. Ere tuwaradu pemegado keje. Pao Kurireu utugarege ere nono nou mostarda a rogu mogadure. Mare mostarda a ji karega inagoino. Pao Kurireu utugarege eire inagoino. Emagakare mare ia meri keje Pao Kurireu utugarege emagamode rugadu. Dujire inagoino.

<sup>33</sup> Ainore Jesus akore. Readodu kigodure bakaruji nou boe ewiagai tuwo erduwado toro nouia Pao Kurireu meardaeji rugadu jii erduwamode jitu oto pa ka. <sup>34</sup> Bakarujire Jesus akoino boe ewiagai. Mare Jesus mugure nou ture jorduwadowugebo tuginai dukeje ure nou ture jorduwadowuge erduwado nou tumagore jiwu bakaruji ewiagai. Nou Jesus ure jorduwadowuge enodo padure doze.

### *Jesus Ure Bakuru Pegareu Akedudo*

<sup>35</sup> Nou meriji rugadu boečoji Jesus makore ture jorduwadowugei. Akore: – Pagurugoduwo awu pobo maereu okwa abowu ka.

<sup>36</sup> Dukodire emagore nou boei etuwo pugeje. Jesus ure jorduwadowuge enodo padure doze. Ere taredo ika kurireuto<sup>†</sup> Jesus apo. Nono eture. Ia boe eture eregodaji ika kurireugebo jamedu.

<sup>37</sup> Ekurugodure dukeje bakuru pegareu aregodure etae. Nou bakuru pegareu ure pobo maereu

---

<sup>†</sup> **4:36** 4.36 Nou ika kurireu kurire rugadu nono ikarereu kurire dumogadure. Mare marigudu dukodire motor bokware. Velare, traiga dogere tu je boe ewo utudo pobo maereuji.

rutudo. Dukodire pobo jeture nou ika kurireuji. Dukodire pobo ure turemo nou ika kurireuto. Dukodire nou ika kurireu korobadugodure pobo tabo. <sup>38</sup> Mare Jesus unudure toro nou ika kurireu upo keje. Aora padure takudau keje. Ča ure jorduwadowuge ere Jesus jetadudo. Eгоре: - Čegimijera! Akaidure pawiwu? Pawimode!

<sup>39</sup> Ča Jesus ure turagojedo. Nono mako rakare bakuruji. Akore: - Akaguru akedudo!

Nono makore poboji. Akore: - Akaba aporudo pugeje!

Dukodire nou bakuru akedure rugadu. Nou pobo butugugodure jamedu. <sup>40</sup> Nono Jesus makore nou ture jorduwadowugei. Akore: - Kodiba tabagudugodure? Kočare tameartorukare i na?

<sup>41</sup> Mare epagudugodure rugadu. Nono emagore pui. Eгоре: - Duboba nure awu imeduče? Kočare bakuru, pobo emeartorure awu Jesus bataruji rugadu!

## 5

### *Jesus Ure Bope Doge Etuwaire Tawuje Ia Imedu Piji*

<sup>1</sup> Jesus aregodure ture jorduwadowugebo toro nou Galiléia pobo maereu okwa abowu ka. Nou etaregodure kawu moto iere Gerasa. <sup>2</sup> Nono Jesus ure tudawuje ika kurireu piji dukeje bope doge emedure tadawu imedu uture Jesus togi. <sup>3</sup> Dukodire nou imedu mugure boe ere bireuge etugu tadawu tori poro tada. Boe etaidure tuwo nou imedu kogudo meriri iku tabo mare meriri



iku rakakare nou imeduji. <sup>4</sup> Marigudu boe ere nou imedu bure kogudo meriri iku tabo. Ere nou imedu iera kogudo meriri iku tabo. Mare nou imedu ure nou meriri iku kado turaga tabo tu tu je. Raka kodure boe eiamedu boe ekori. <sup>5</sup> Nou imedu meru pagare tori aoji, nou tori poro jamedu boe parugajeje meriji boečoji. Kudu pagare meri jamedu boeji tu tu je. Ure tuwiri kado nou tori mega tabo rugadu.

<sup>6</sup> Nou imedu aiwo jaere Jesus togi. Nono rekodure toro ae. Aregodure Jesus ae dukeje ure tubu jodo moto keje Jesus jokorai. <sup>7-8</sup> Dukejere ure tugudu rakado. Akore: – Jesus nure aki! Pao Kurireu Onaregedu nure aki! Boe eiamedu boe eimijera kurireu nure Pao Kurireuče!

Jesus akore: – Bope uwari nure aki. Atawuje awu imedu piji!

Nou bope uwari akore: – Nuba aromode čei? Akaba itudo boe pegareuto. Amagodo Pao Kurireu biagai aro pegamodukaie i rugadu.

<sup>9</sup> Jesus unarare ji. Akore: – Nuba akiere?

Nou meture nou imedu tadawu bope uwari akore: – Čegiere bope doge makareuge. Čemagare awu imedu tada.

<sup>10</sup> Nono nou meture nou imedu tadawu bope doge enogwamagudure Jesusji ukawo tududo nou moto piji. <sup>11</sup> Jugureuge edu puredure togwage tabo nono. <sup>12</sup> Dukodire nou meture nou imedu tadawu bope doge enogwamagudure Jesusji nou imedu ja piji. Eгоре: – Čedudo toro nou jugureuge etae. Čedo čeremo nou jugureugeto.

<sup>13</sup> Nono Jesus ure etudo. Dukodire nou bope doge ere tudawuje nou imedu piji. Ere turemo nou jugureugeto. Dukodire nou jugureuge eiamedu boe eregodure kuri ia moto ri ao piji tači poboto. Dukodire eiamedu boe ewire poboto. Enodo padure dois mil.

<sup>14</sup> Nou jeture nou jugureuge eiwuge ime eregodure nou boe epiji toro tuwai mugure tadawu ba kurireu ka. Ereadodure Jesus rore jiboeji nou ba kurireu tadawu boe ewiagai. Ereadodure boe eiamedu boe ewiagai nou moto jamedu boe parugajeje jamedu. Dukodire nou boe eture Jesus ae tuiorduwo ji, tuiorduwo nou imeduji jamedu. <sup>15</sup> Etaregodure Jesus ae dukeje erdure nou bope doge emedure tadawu imeduji pemegagodure duji. Butugugodure. Ukudau areia meture ji. Erduware ji. Erduware Jesus ure bope doge etawuje nou imedu piji dukodire nou imedu pemegagodure. Dukodire nou boe epagudugodure. <sup>16</sup> Jordure nou Jesus rore jiwuge ereadodure nouia boe ewiagai nuba Jesus rore nou bope doge emedure tadawu imeduji. Ereadodure nou bope doge ere turemo jugureugeto duji nouia boe ewiagai jamedu.

<sup>17</sup> Nou boe epagudugodure dukodire enogwamagudure Jesusji utuwo nou to moto piji.

<sup>18</sup> Dukodire Jesus uiago taredo ika kurireuto pugeje. Mare nou bope doge ere tudawuje pijiwu imedu okwamagudure Jesusji. Akore: - Itaidure ikoduwo akabo.

<sup>19</sup> Mare Jesus makore ji. Akore: - Boro. Atudo aibagi awobe etae. Areadoduwo ewiagai nuba Pao Kurireu ro pemegare ai duji rugadu.

Areadodudo ewiagai Pao Kurireu ro pemegare ai du boeji.

<sup>20</sup> Dukodire nou imedu uture Jesus piji tuwobe etae. Boe eda enodo padure dez nou moto keje. Nou imedu readodure Pao Kurireu ro pemegare pudui duji boe eiamedu boe ewiagai nou moto jamedu boe parugajeje. Boe eiamedu boe erore ta je nou imedu akoino tureadodu tabo Pao Kurireu bataruji boe ewiagai duji.

*Jesus Ure Ia Areme Epemegago*

<sup>21</sup> Jesus kurugodure nou pobo maereu kajeje tuibagi. Aregodure toro dukeje boe emagare nono pobo okwai. <sup>22</sup> Judeu doge ere bato pui ia bai tada tu tu je. Jeture nou bai jiwu boe eimijera iere Jairo. Nou imedu Jairo aregodure Jesus togi. Dukejere ure tuwududo moto keje Jesus jokorai. <sup>23</sup> Dukejere okwamagudure Jesusji. Akore: – Itonaregedu aredu bigodunure. Mato itabo awo akera bu biri keje pemegagoduwo, bikawo.

<sup>24</sup> Dukodire Jesus uture nou Jairo apo. Boe emagare rugadu tugodui Jesus rekodaji dutabo. Nono nou boe emagare rugadu dukodire ere taiado pači Jesus apo. <sup>25-26</sup> Ia aredu kodure ebo Jesus rekodaji. Marigudu nou aredu kogodaere tu tu je. Nou aredu ku rere piji nono areme etorewudae mogadure. Mare nou aredu o akedukare piji. Re kimore piji meri jamedu boeji. Joru oto padure doze nou aredu ku rere piji dukeje. Kodire uture jorubo epage etae. Ure diero rugadu maku jorubo epage etai mare ekare nou aredu pemegago. Pegare kimo. Jorubo epage etaiwore ji dukeje nou kogodae ure

turagado ji rugadu. <sup>27-28</sup> Nou aredu meardure Jesus rore jiboeji. Dukodire uture ae. Mare boe emagare nono Jesus apo. Dukodire nou aredu makore tudada. Akore: - Ikera otorogu jetumode awu Jesus ukudau areiaji dukeje ipemegagodumode.

Nono nou aredu ure tugera raido. Nono iera otorogu jeture Jesus ukudau areiaji.

<sup>29</sup> Ča nou aredu pemegagodure tači je. Nou aredu ku rekare piji pugeje. Jorduware tubemegagodure duji rugadu. <sup>30</sup> Ča Jesus jorduware ia turaga iogore ia boei duji. Dukodire ure tuwuredo taiwowo nou boei. Akore: - Ioguduba ure tugera raido ikudau areia ka?

<sup>31</sup> Nou ure jorduwadowuge emagore ji. Eгоре: - Kodiba akagore aino? Boe emagare woe pagabo. Boe eiamedu boe ekerajeture akudau areiaji.

<sup>32</sup> Mare Jesus aiwore nou boei nou iera jeture tugudau areia jiwu bagai. <sup>33</sup> Nou aredu jorduware tubemegagodure duji. Dukodire ure tuburedo Jesusji. Mare pagudure dukodire mororamagadure. Ure tubu jodo moto keje Jesus jokorai dukejere readodure turore jiboeji Jesus biagai. <sup>34</sup> Jesus makore ji. Akore: - Are. Ameartorure i dukodire apemegagodure. Amoramagadukaba. Ire akogodae akedudo apiji rugadu.

<sup>35</sup> Jesus mako kimore nou areduji dukeje ime etaregodure etae Jairo uwai piji. Emagore Jairoji. Eгоре: - Akanaregedu rogu bokware. Amagokaba nou pagimijeraji pugeje. Piji.

<sup>36</sup> Jesus meardure emagore jiboeji mare bia-pagakare ewadaruji. Makore Jairoji. Akore: – Amorongamadukaba. Ameartorudo i rugadu.

<sup>37</sup> Nono uture Jairo apo, Pedro apo, Tiago apo, Tiago uwie João apo. Èture toro Jairo uwai ka. Mare nouia ture jorduwadowuge ukare etudo pudabo. Kodire etukare rugadu.

<sup>38</sup> Jesus aregodure Jairo uwai ka Pedro apo, Tiago apo, João apo dukeje erdure boei nono. Nou boe etragudu rakare. Ekiarigodure rugadu etonaregedu bire kodi. <sup>39</sup> Nono Jesus ure turemo tumagowo ei. Akore: – Kodiba tagragodure? Kodiba tagiarigodure? Aredu bikare. Un-udunure!

Jorduware tumoduie jewodudo pugeje. Dukodire akoino unudunuie.

<sup>40</sup> Mare nou boe erduware nou nogwaredu bire rugadu duji dukodire enogwarigodure Jesusji. Dukodire Jesus ure etudo nou bai piji. Nono ure tugeragu nou aredu učeji, ure tugeragu aredu uoji. Ure tugeragu Pedroji, Tiagoji, Joãoji jamedu. Nono ure turemo ebo nou aredu padure tadawu baito. <sup>41</sup> Jesus ure tugeragu nou aredu ieraji dukeje makore ji ewadaru tabo. Akore: – Talitá cumi!

(Boe ewadaru tabo akore: – Are! Amugudo! Imire inagoino ai!)

<sup>42</sup> Ča nou aredu ure tumugudo tači je. (Nou aredu o joru oto padure doze.) Nono ure turagojedo. Merure nou bai ja tada. Uče, uo erore ta je. <sup>43</sup> Nono Jesus makore ei ekawo boe ewie turore jiboeji boe ewiagai. Dukejere Jesus akore: – Awu tagonaregedu okwagedo.

## 6

### *Nazaré Ba Kurireu Kejewuge Etaidukare Jesusji*

<sup>1</sup> Jesus uture Jairo uwai piji tuduwo turijodure kejewu Nazaré ba kurireu ka. Ure jorduwad-owuge eture rekodaji. <sup>2-3</sup> Sábado meriji Jesus uture Judeu doge ere bato puiwu bai ka. Nonore ure boe erduwado nou bai tada. Nono boe emagare nou bai tada jamedu. Emeardure Jesus bataruji dukodire erore ta je. Mare erdu pemegakare ji. Eгоре: - Awu Jesus maragodumode ira jiwu imedu nure ema. Boe eimijera karegure ema. Čerduware uwobe eiamedu boei. Uče iere Maria. Uwie ime ekiere Tiago, José, Judas, Simão. Uwie areme emugu kimore woe awu pago ba kurireu keje rugadu. Ioguduba ure awu imedu jorduwado? Ioguduba ure turaga maku ai ro rakawo awu turo rakareu boeji? Boe eimijera karegure ema. Boe eimijera ukare jorduwado. Pagare akoino. Ro rakare mare pagatu je.

Nono nou boe emeartorukare Jesusji.

<sup>4</sup> Jesus makore nou boei. Akore: - Makore Pao Kurireu bataru jiwu makore jiboe pemegamode boei. Boe emeartorumode ji. Mare turijodure kejewu boe eda kejewuge etaidumodukare makore jiboeji. Uwobe uwai tadawu boe etaidumodukare makore jiboeji. Tu emage rugadu. Iage etaidumode ji.

<sup>5-6</sup> Boe emeartorukare Jesusji nono. Dukodire Jesus roiwakare tuwo turo rakareu makado nono nou turijodure kejewu moto keje. Akore: - Kočare awu boe emeartorukare i.

Ure ia boe epemegago. Mare emagakare. Ure tugera bu ewugeje dukeje ure epemegago rugadu.

*Jesus Ure Tumaragodae Maku Ture Jorduwadowuge Etai.*

Nono Jesus uture nou boe epiji. Aregodure ia boe eda ka pugeje. Nono ure boe erduwado pugeje. <sup>7</sup> Nono makore ture jorduwadowuge ewagai. Enodo padure doze. Jesus aidure tuwo etudo tuwadaru tabo boe eiamedu boe etae. Ure edo pobe tu tu puapo boe etae. Ure eragado ewo bope doge etawuje boe epiji. Jesus makore nou ture jorduwadowugei. <sup>8-9</sup> Akore: – Tadukaba tage tabo. Tadukaba diero tabo. Tagaba tagoroe reko jamedu. Tadukaba ia tagedu jiwu tagaibo tabo. Tadudo tu meture taiwu tagudau areia tabo. Tadudo tu nou tawure tadawu tabo. Tadukaba ia tagudau tabo pugeje. <sup>10</sup> Tagaregodumode ia boe eda ka dukeje tardumode boei. Etaidumode tai dukeje tagamudo ebo ji nou tadumode kejewu meri ka. <sup>11</sup> Mare tagaregodumode ia boe eda ka pugeje mare nou boe ekimadumodukare tagabo. Etaidumodukare tuwiapagawo tawadaruji. Dukeje tadudo epiji. Tadumode epiji dukeje tawure okeakejewu to pui egai tawo moto urugudu barigu tawure okeakejewu piji nou boe erduwo Pao Kurireu aidukare nou erore jiboeji kodire umode tugera ra epiji.

<sup>12</sup> Nono nou Jesus ure jorduwadowuge eture. Emagore Jesus bataruji boe ewiagai ewo tugera

ra turo pegareu piji. <sup>13</sup> Nou Jesus ure jorduwad-owuge ere bope doge ewari etawuje boe epiji. Ere boekaguru redo kogodureuge etaora keje nono Pao Kurireu ure epemegago rugadu.

### *João Batista Bitodure*

<sup>14-15</sup> Boe eiamedu boe emeardure nou Jesus roro jiboeji. Etaidure tuiorduawo kakojiwu imedu ba ure ema. Iage egore: – Elias nure ema.

Mare iage egore: – Boro. Elias karega. Ia makore Pao Kurireu bataru jiwu nure ema. Ure nono jaoboe makore Pao Kurireu bataru jiwuge emogadure.

Mare ia boe egore: – Boro. João Batista nure ema. Jewodure pugeje! Dukodire rakare tuwo boe pemegado boei.

Boe eimijera kurireu Herodes meardure nou inoduji jamedu.

<sup>16</sup> Herodes akore: – João Batista nure ema rugadu. Ire João Batista itoru kado kodire bire. Maçare jewodure pugeje.

Mare Herodes okware boeto. João Batista bire rugadu.

<sup>17-18</sup> Marigudu nou Herodes ure tugeragu tumana Filipe oredujeji tumana piji toreduječe. Nou aredu iere Herodias. Herodes ure tugeragu ji tumana piji tumuguwo apo rugadu. Dukodire João Batista mako pegare Herodes roro aino duji. Mako raire ji. Akore: – Arokaba aino amana oredujeji. Paro kigodukare aino. Ameartoru bokware dukodire amugure nou aredu Herodias apo.



Ainore João Batista akore. Herodias korigodure João Batista akoino duji dukodire Herodes makore to tugobaigaregei ewo João Batista kogudo tuwo tugu baiçoreuto. <sup>19-20</sup> Herodias korigodu kimore João Batistaji dukodire aidure tuwo bito. Mare boe etaidure João Batistaji. João Batista ro pemega kuriçigore boe eiamedu boeji. Dukodire Herodes pagudure turo pegawo João Batistaji dukodire ukare João Batista bito. Herodes aidure tuwiapagawo João Batista bataruji. Mare biapagare João Batista bataruji dukeje biagorore rugadu.

<sup>21</sup> Ia meri keje Herodias jorduware nuba tur-omode tuwo João Batista bito. Herodes ure tuwadae towuje tuwiabutuwo tuwudure kejewu ari keje. Makore boe eimijerage eiamedu boe ewagai Galiléia moto keje. Etaregodure tuwaduwo apo nou meriji. Makore tugobaigarege eimijerage ewagai jamedu. <sup>22</sup> Ere bato pui dukeje Herodias onaregedu rerure nou boe eiamedu boe egai. Ure Herodes jakaredo pudui. Ure nou boe eimijerage eiamedu boe egaredo pudui jamedu. Dukodire Herodes makore nou nogwareduji. Akore: - Ameartorudo i. Kaba jiba akaidure? Imode akogwamagudure bagai boe jamedu boe maku akai rugadu.

<sup>23</sup> Nono Herodes mako pemegare ji pugeje. Akore: - Imagore jiboe imodukare udo tugirimi. Imode maku. Imode akaidure jiboe maku akai rugadu. Akaidumode ia ino motoji dukeje imode ino moto kado puiato. Imode maku akai rugadu.

<sup>24</sup> Nono nou nogwaredu uture epiji tuje bagai.

Makore tujeji. Akore: – Kaboba bagaiba inogwamagudumode Herodiji?

Uče makore tonaregeduji. Akore: – Akogwamagududo João Batista aora bagai.

<sup>25</sup> Dukodire nou nogwaredu uture tui bagi tumara tabo Herodes ae. Akore: – Itaidure João Batista aoraji. João Batista aora bu ia baku keje kuri aino rugadu awo aora maku inai.

<sup>26</sup> Herodes meardure nou inoduji dukeje kiarigodure rugadu. Aidukare tuwo João Batista bito. Mare makore nou boe egai tumoduie nou nogwaredu okwamagudure bagaiboe jamedu boe maku ai rugadu. Nou makore bagaiboe makudumoduie ai rugadu. Dukodire Herodes aidukare tuwo tuwadaru pogurudo. <sup>27</sup> Dukodire makore ia tugobaigare bagai uwo João Batista bito, uwo aora kado piji, uwo João Batista aora reko puda. Dukodire nou tugobaigare uture João Batista bagai nou baičoreu ka tuwo João Batista bito. Ure João Batista itoru kado kodire ure bito. <sup>28</sup> Dukejere tugobaigare aregodure João Batista aora tabo. Padure baku keje. Nono ča ure maku nou nogwaredu ai. Dukeje čare nou nogwaredu ure reko toro tuje ae rugadu. <sup>29</sup> Nono ča João Batista utugarege emeardure nou inoduji dukeje etaregodure tugimijera bireu bagai. Nono ča ere tugeragu bireuji. Ere reko toro to moto ka tuwo tugu toro to moto keje.

*Jesus Ure Boe Eke Maku Boe Etai. Ime Enodo Padure Cinco Mil*

<sup>30</sup> Uture Jesus bataru tabowuge ere tugirimi Jesus ae pugeje. Enodo padure doze. Ereadodure

ture jiboeji, tumagore jiboeji Jesus biagai.  
<sup>31</sup> Boe emagare nono. Etaregodure tumagowo Jesusji. Iage eture mare iage etaregodure pugeje tumagowo Jesusji jamedu. Dukodire Jesus roi-wakare tuwo boe kowuje nou boe doge eigoia. Nou ure jorduwardowuge enogwagekare jamedu. Dukodire Jesus makore ei. Akore: - Paduwo ia boe eda tuginaiwu ka awu boe epiji pawo pagamudo.

<sup>32</sup> Dukodire eture ika kurireu tabo ia boe maereu ka nou boe epiji tuwo tamudo. <sup>33</sup> Mare boe erdure ei rugadu. Dukodire eregodure ika kurireu me keje taregoduwo nou ika kurireu otodai tubagawo ewagai toro. Nou boe emagare toro. Etaregodure boe eda jamedu boe piji.

<sup>34</sup> Jesus aregodure nou pobo maereu okwa ka ture jorduwardowugebo. Mare boe emagare nono marigudu. Jesus ure tudawuje ika kurireu piji dukeje jordure nou boei rugadu. Okudugodure ebo rugadu. Akore eie nono ovelha doge emogadure. Jetu pemegare eiwu bokwaie. Mare ovelha ji karega akoino. Nou boe eroiwakare tuwo tuginorudo. Dujire akoino. Dukodire mako raire ei tuwo erduwado boe jamedu boeji.

<sup>35</sup> Merirekodutabo Jesus ure jorduwardowuge etaregodure ae. Enodo padure doze. Emagore Jesusji. Egore: - Merirekodure. Awu boe etudo awu boe maereu piji. Boe bokware woe du kodi.

<sup>36</sup> Awu boe etudo ia boe etae ewo tugeragu ia tuge roguji.

<sup>37</sup> Mare Jesus makore nou ture jorduwardowugei. Akore: - Boro. Taigoiare tamode enogwagedo.

Egore: - Awu boe emagare. Boe maragodu-mode kejewu arimode oito dukeje o dieromode tuwo akirodo boe ekeji awu boe ekeče. Mare pago diero bokware. Nuba paromode pawo enogwagedo?

<sup>38</sup> Nono Jesus makore ei. Akore: - Page amireu rogure? Tagaiwodo bagai.

Dukodire Jesus ure jorduwadowuge etaiwore amireu bagai. Erdu iaji dukeje ere reko Jesus ae. Egore: - Akaiwodo. Čerdure jiwu amireu ure ikera aboudure tu je. Page karo rogu ere pobetu je.

<sup>39</sup> Nono Jesus makore nou boei ewo tudo pui ewo tudo cinquenta ewo tudo cem tu tu tumuga boe keje.

<sup>40</sup> Dukodire nou boe eiamedu boe ere tudo pui. Ere tudo cinquenta ere tudo cem tu tu nou tumuga boebutu keje. <sup>41</sup> Nono Jesus ure tugeragu nou amireuji nou kare kugurei. Nou amireu ure ikera aboudure. Nou kare kugure ere pobetu je. Nono Jesus aiwore baruto. Dukeje Jesus imadure Pao Kurireu apo nou amireu paru tabo nou kare kugure eparu tabo jamedu. Nono ure nou amireu kado tuwo maku nou ture jorduwadowuge etai ewo pedo nou boe dogei jamedu. Nono Jesus ure nou kare ekado jamedu nou ture jorduwadowuge ewo pedo ei jamedu.

<sup>42</sup> Jesus koiare ure nou boe doge eke kodudo tugori boe eiamedu boe etai. Boe eiamedu boe enogwagere rugadu. Ekuredure egarere pudui rugadu. <sup>43</sup> Ča nou Jesus ure jorduwadowuge ere nou kadarabo doge korau nou boe eke kobo tabo. Nou kadarabo doge enodo padure doze nou boe

eke kobo tabo rugadu. <sup>44</sup> Ime enodo padure cinco mil nono togwage tabo nou meriji.

### *Jesus Merure Pobo Aoji*

<sup>45</sup> Kuri je dukeje Jesus makore nou ture jor-duwadowugei ewo turemo ika kurireuto etuwo tododai. Ekurugoduwo nou pobo maereu kajeje toro bakowu ka toro Betsaida ba kurireu ka. Jesus rakoje eiageje tumago tabo nou boei tuwo etudo. <sup>46</sup> Jesus uture nou boe epiji dukeje Jesus ruture toro ia tori ao ka tuginaigodu tumagowo Pao Kurireuji. <sup>47</sup> Boečodure dukeje nou Jesus ure jor-duwadowuge eture tabowu ika kurireu mugu kimore nou pobo maereu oiadada. Mare Jesus rakoje kimore toro nou tori aogeje tuginaigodu. <sup>48</sup> Barogwakododukare raga dutabo Jesus jordure ture jor-duwadowugei toro pobo maereu oiadada. Bakuru jore etogi. Boe korire nou bakuruji rugadu dukodire ere tubeodo pudui traiga tabo nou ikaji nou bakuru togi. Toro baregodutabo, Jesus uture toro tumeru tabo pobo aoji. Ča ure tugoduiago toro etododai. <sup>49</sup> Mare nou ture jor-duwadowuge erdure Jesus merure pobo aoji. Emeardaere ia boe pegareu nuie ema. Dukodire epagudugodure. Nono etokudure tubagudu koia če.

<sup>50</sup> Eiamedu boe epagudugodure rugadu. Ča Jesus makore ei. Akore: – Taragado tai! Imi rugadu reo. Tabagudukaba.

<sup>51</sup> Nono ure turemo ika kurireuto ebo. Ča nou bakuru rakareu akedure tači je. Nou ure jor-duwadowuge erore ta je. <sup>52</sup> Jesus ure boe enogwagedo jawu meriji. Boe ekuredure

rugadu dukodire egarere pudui. Mare nou ure jorduwadowuge etaidukare tumeartoruwo ji dukodire erduwakare Jesus rore jiboeji. Pao Kurireu maragodae reno. Ča Jesus merure pobo aoji, ure bakuru rakareu ake-dudo jamedu mare nou ure jorduwadowuge etaidukare tumeartoruwo ji raga dukodire erduwakare nou Jesus rore jiboeji pugeje. Pao Kurireu maragodae reno pugeje.

### *Jesus Iogore Boei Genesaré Ba Kurireu Keje*

<sup>53</sup> Ekurugodure nou pobo maereu kajeje dukeje etaregodure Genesaré moto ka. Nonore ere to ika kurireu bu. Ere kogudo. <sup>54</sup> Ere tudawuje to ika kurireu piji dukeje boe er-dure Jesusji. Erduware Jesus ure ema duji. <sup>55</sup> Dukodire nou boe eregodure nou boe eda jamedu boeji tuwo nou boe ewie Jesus aregodure duji. Dukodire boe eiamedu boe etaregodure tuwobe kogodureugebo Jesus ae. Nou kogodureuge epadure tugudau kodo keje. <sup>56</sup> Jesus uture nou boe eiamedu boe eda ka. Uture boe eda ka dukeje boe etaregodure ae kogodureugebo. Enogwamagudure Jesusji kogodureuge ewo tugera bu Jesus ukudau areia okwa keje. Uture ba kurireu ka dukeje boe etaregodure ae kogodureugebo nono jamedu. Enogwamagudure Jesusji kogodureuge ewo tugera bu Jesus ukudau areia okwa keje jamedu. Nono nou ure tugera bu Jesus ukudau areia okwa kejewuge eiamedu boe epemegagodure rugadu.

## 7

### *Jesus Makore Nou Judeu Doge Eroiaji*

<sup>1</sup> Ia fariseu doge etaregodure Jerusalém piji Jesus ae. Ia jorduware Judeu doge eno bakaru jiwuge etaregodure Jerusalém piji Jesus ae jamedu. Ere bato pui Jesus ae. <sup>2</sup> Erduware Jesus ure jorduwadowuge enogwagere tugera tabo duji. Nou fariseu doge etaidure boe ewo tugera kabi nono mariguduwuge tuwobe ero mogadure. Judeu doge erore tu tu aino togwagewo. Mare nou Jesus ure jorduwadowuge erokare nono ero mogadure.

<sup>3</sup> Marigudu fariseu doge, Judeu doge eiamedu boe erore nou mariguduwuge tugimijerage ere maku pudaiwu bakaru tadawu ero boeji tu tu je. Dukodire marigudu ere tugera kabi nono mariguduwuge Judeu doge ero mogadure togwagewo tu tu je. Ainore erore jii aino.

<sup>4</sup> Emode akirodo tugeji nou boe jeto tadawu bai piji dukeje emode kabi nono mariguduwuge Judeu doge ero mogadure jamedu tu tu je. Mariguduwuge Judeu doge eno bakaru kurire dukodire erore jiboe makare rugadu. Kodire ere turuwobo kabi tu tu je. Ere tudaria kabi tu tu je. Ere tubagaga kabi tu tu je. Ere tubadure kejewu kamoreu kabi tu tu je jamedu. Emodukare tugera ra turore aino dupiji rugadu. Turoia jire eroino tu tu je tuwo nou jamedu boe pemegado turowo nou to bakaru tadawu turo boeji tu tu je.

<sup>5</sup> Dukodire nou fariseu doge, nou jorduware Judeu doge eno bakaru jiwuge etaidukare nou Jesus ure jorduwadowuge ekare tugera kabi

duji. Enarare Jesusji. Egore: – Kodiba nou are jorduwadowuge emeartorukare mariguduwuge pawobe emagore jiboeji? Erokare nono nou mariguduwuge pawobe ero mogadure. Enogwagere mare ekare tugera kabi nono nou mariguduwu paro mogadure. Ukare turugadu.

<sup>6</sup> Mare Jesus makore ei. Akore: – Tare boe erduwado mare tameartorukare tawadaruji. Boe jokodu jire Isaías akoino marigudu. Marigudu rugadu ure pawobe ewie taromode tameardae-mode jiboeji. Marigudu Isaías akore:

– Pao Kurireu ure boe ewie rugadu. Akore: “Awu boe emagore togwa tabo tumeartoruie i mare emeardae remawu ure tuginai rugadu toro imeardae piji rugadu.

<sup>7</sup> – “Awu boe ere tubu jodo tumago pemegawo i mare pagare egoino. Ere boe erduwado bakaruji. Egore iwadaruie. Mare pagare egoino. Ia tumagore jiwu bakaru jire nou boe egoino.”\*

<sup>8</sup> Jesus makore nou fariseu dogei pugeje. Akore: – Taro kodure nou imedu Isaías ure boe ewie jiboeji rugadu. Tare tagera ra Pao Kurireu bataru remawu piji tameartoruwo tu tameardaeji. Pao Kurireu bataru ji karega tagagoino.

<sup>9</sup> – Jeroreuge nure tagi. Tamago moture tawo boe emeartorudo tawadaruji ekoduwo nou tameardae rekodaji emeartorukawo Pao Kurireu bataru remawuji. <sup>10</sup> Marigudu Moisés ure pawobe erduwado Pao Kurireu bataru remawuji. Akore: “Tameartorudo taoji tajeji. Ča nou boe

---

\* **7:7** 7.7 Awu bataru padure Isaías 29.13 keje.



mako pegamode tuoji tujeji tuwo epogurudo dukeje bitoduiago.” Ainore Pao Kurireu akore jawu tawobei.† <sup>11</sup> Mare tagi tare boe erduwado ia bataru tuginaiwuji boe ekawo tugera maku tuo ai tuje ai. Tagagore imedu makomoduie tujeji tuoji tumodukaie tugera maku etai tumoduie toe maku Pao Kurireu ai kodi. Dukodire tumodukaie tugera maku tuo ai tuje ai. Ainore boe eromoduie. <sup>12</sup> Mare pagare egoino. Etaidukare tuwo tugera maku tuje ai tuo ai dukodire egoino. <sup>13</sup> Taigoiare tare boe egodo aino. Dukodire čare tagaidukare Pao Kurireu bataruji rugadu. Tameartorukare ji. Tagaidure tagoduwo nou tameardae rekodaji. Ainore tarore ia taroji jamedu. Tare taro udo tuginai Pao Kurireu meardae remawu piji rugadu.

### *Ainore Boe Emode Tubegado*

<sup>14</sup> Nono Jesus makore boe makareuge etae ewo bato pui pudae. Makore nou boei. Akore: – Taiamedu boe tawiapaga pemegado iwadaruji. Iwo tarduwa kuričigodo iwadaruji. <sup>15-16</sup> Nou tagwagemode jiboe umodukare tabegado Pao Kurireu jakai dukodire tawujedumodukare tago bakaru tadawu taro piji. Mare nou taiabi-jiwu tawadaru pegareu umode tabegado Pao Kurireu jakai dukodire tawujedumode tago bakaru tadawu taro piji jii je.

<sup>17</sup> Dukeje Jesus uture nou boe epiji. Ure turemo ia baito. Nono nou ure jorduwad-owuge enarare Jesusji uwo tuiorduwado kaba

---

† **7:10** 7.10 Awu bataru padure Êxodo 20.12, 21.17, Levítico 20.9, e Deuterônômio 5.16 keje.

jiba akoino nou boei. <sup>18</sup> Jesus makore nou ture jorduwadowugei. Akore: - Tarduwa bokware nono nou boe emogadure. Tawiapaga pemegado iwadaruji. Tamodukare tabegado tage tabo rugadu. <sup>19</sup> Tamode tage ko dukeje taguredumode. Nono umode tudawuje tabiji. Mare tabemega kimomode tarowo boe eno bakaru tadawu boe ero boeji. Tage umodukare tameardae pegado boei.

Tagoino dutabo Jesus ure nou Judeu doge eno bakaru tadawu ia ero akedudo. Nou bakaru akore ekaiago ia tuge kowuje tuwo tubemegado turowo nou to bakaru tadawu boe ero boeji. Aino čare Jesus ure nou bakaru akedudo. Boe eke jamedu boe uie turugadu.

<sup>20</sup> Nono Jesus makore ei pugeje. Akore: - Boe ero pegareu umode tudawuje boe emeardae piji. Nou inodu koiare umode boe epegado Pao Kurireu jakai dukodire etawujedumode to bakaru tadawu turo piji jii je. <sup>21</sup> Du nou boe emeardae pegareu aregodumode epiji rugadu. Emode nou tumeardae tawuje turo pegawo rugadu. Ero pegamode tieribari tabo. Ekiwogumode. Emode boe ewido. <sup>22</sup> Eribarimode toreduje piji toredu piji. Enogwa kidumode tu pudai tuwo toe kurido tumedage epiji. Emode turo pegareu kurido rugadu. Boe emode boe ekiripagado. Boe etaora bai baimode tuge kurure pudui dutabo. Boe ekorigodumode boe enoe keje. Boe emago pegamode tumedage eroji. Boe enojaromode tuwadaruji. Boe erduwa bokwamode turore jiboeji. <sup>23</sup> Boe emode tumeardae pegareu tawuje turowo awu boe ero pegareu

jamedu boeji. Awu boe ero pegareu koiare umode boe epegado rugadu Pao Kurireu jakai dukodire etawujedumode to bakaru tadawu turo piji jii je.

### *Aredu Tuginaiwudo*

<sup>24</sup> Nono Jesus uture nou boe epiji. Uture toro ia moto ka. Puredure Tiro ba kurireuji. Nono ure turemo ia boe ewaito. Aidure tuwo tamudo. Aidukare boe erduwawo turagojere nono duji mare boe erdure ure turemo nou bai toduji.

<sup>25</sup> Ia aredu jorduware Jesus rakojere nono duji. Bope uwari meture nou aredu onaregedu tada. Dukodire uče aregodure Jesus ae. Ure tubu jodo moto keje Jesus jokorai. <sup>26</sup> Nou aredu Judeu kejewu aredu karegure ema. Boture Fenícia moto keje puredure Síria motoji. Okwamagudure Jesusji uwo nou bope uwari tawuje tonaregedu aredu piji. <sup>27</sup> Mare Jesus makore ji. Akore: – Boe etore enogwagewo jii tuguredu ka. Ukare turugadu boe ewo tore eke rogu tawuje epiji tuwo maku tagu ariga doge etai.

<sup>28</sup> Nou aredu jorduware boe etore ji karega Jesus akoino duji. Jorduware Judeu dogeire Jesus akoino duji. Jesus aregodure moto ka tumagowo Judeu dogei rugadu. Nono nou aredu makore Jesus bataru jipagi. Akore: – Boe rugadu. Mare ariga doge epuredumode boe etorei tuwo nou buture ira kudawu boe etore eke gigudu rugadu boe kowuje.

<sup>29</sup> Jesus akore: – Boe jokodu. Atudo aibagi awai ka akanaregedu aredu bagai. Ire nou bope uwari tawuje piji dukodire akanaregedu

pemegagodure rugadu. Nou bope uwari ure tudawuje piji.

<sup>30</sup> Dukodire nou aredu ure tugirimi tuibagi tuwai ka tuiorduwo tonaregeduji. Aregodure tuwai ka dukeje jordure tonaregedu padure kamoreu keje duji. Pemegagodure. Nou bope uwari ure tudawuje piji rugadu.

### *Jesus Ure Bija Bokwareu Imedu Pemegago*

<sup>31</sup> Nono Jesus uture nou Tiro ba kurireu kejewuge epiji. Uture Sidom ba kurireu ka. Dukeje merure boe eda kejewu motoji. Boe eda enodo padure dez nono nou moto keje. Nono aregodure nou Galiléia pobo maereu okwa ka. <sup>32</sup> Nonore ia boe etaregodure Jesus ae ia bija bokwareu imedu apo. Roiwakare tumagowo jamedu. Nono nou boe enogwamagudure Jesusji uwo tugera bu nou imedu keje pemegagoduwo. <sup>33</sup> Dukodire Jesus ure taradaino boe epiji nou imedu apo. Jesus ure tugera bu nou imedu bija keje pudogi. Dukejere ure todoguru bu tugerako keje. Nono ure raido nou imedu eru ka. <sup>34</sup> Nono Jesus aiwore baruto. Ure ake tawuje tubiji. Dukejere makore Judeu doge ewadaru tabo. Akore: – Efatá.

(Boe ewadaru tabore boe egore: “Uwo tuiado” aino.)

<sup>35</sup> Ča nou imedu bija pemegagodure pugeje tači je. Meardure boe emagoji rugadu. Makore jamedu. Mako pemegare. <sup>36</sup> Nono Jesus makore nou boei ekawo boe ewie nou turore jiboeji. Makore ei mare emeartorukare. Ere boe ewie rugadu. <sup>37</sup> Biapagare nou Jesus ro jiwuge eiamedu boe erore ta je. Egore: – Awu Jesus ro

pemegare rugadu! Rakare rugadu kodire umode bija bokwareuge ewija epemegago emearduwo boeji erduwawo boe emagore pudui duji. Rakare tuwo mako bokwareuge emagodo pugeje.

## 8

### *Jesus Ure Ia Boe Makareuge Enogwagedo Jamedu*

<sup>1</sup> Ia meri keje boe ere bato pui pugeje tuwia-pagawo Jesus bataruji. Emagare rugadu. Enodo padure quatro mil. Čare eke akedure dukeje Jesus makore nou ture jorduwadowuge etae. Nono ča makore ei. <sup>2</sup> Akore: – Inogudugodure awu boebo. Merire pobe metia bokware ei woe itabo. Woe boe eke bokware rugadu ewo ko. <sup>3</sup> Itaidukare iwo etudo tuguri bioro tabo mare eragamodukare tumeruwo awaraji pugeje. Iage etaregodu jaere woe itae.

<sup>4</sup> Nou Jesus ure jorduwadowuge egore: – Nou boe emagare rugadu woe pagabo. Nuba čeromode woe boe maereuto boe eke bagai nou boe ekeje?

<sup>5</sup> Jesus akore: – Nuba tage amireu rochure tu je? Egore: – Amireu oto padure sete.

<sup>6</sup> Nono Jesus makore boe eiamedu boei ewo tumugudo moto keje. Dukejere ure tugeragu nou amireuji. Nono imadure Pao Kurireu apo nou amireu paru tabo. Dukejere ure nou amireu kado. Ure maku ture jorduwadowuge etai ewo reko boe etae. Dukodire ere pedo boe eiamedu boei rugadu. <sup>7</sup> Ia kare kugurere nono jamedu. Jesus imadure Pao Kurireu apo

nou kare kugure eparu tabo. Dukejere makore ture jorduwadowugei ewo nou kare kugure pedo boe eiamedu boei jamedu. <sup>8-9</sup> Nono ča nou boe eiamedu boe enogwagere. Egarere pudui rugadu tuguredure duji. Emagare. Enodo padure quatro mil. Nono ča nou Jesus ure jorduwadowuge ere kadarabo korobaduregedo sete nou boe eke kobo tabo. Nono Jesus makore nou boei ewo tugirimi tuibagi tuwai ka pugeje. <sup>10</sup> Dukejere Jesus ure taredo ika kurireuto ture jorduwadowugebo. Eture toro Dalmanuta moto ka.

### *Fariseu Doge Etaidure Tuiorduwo Ia Jesus Ro Rakareuji*

<sup>11</sup> Ia fariseu doge etaregodure Jesus ae. Ere tunarado ji tumago rakareu tabo tuiorduwo jorduwamode rugadu dubagai. Dukodire enogwamagudure Jesusji uwo ia turo ro rakareu to tiagai tuiorduwo nouia ro rakareu aregodure rugadu Pao Kurireu piji du bagai. <sup>12</sup> Mare Jesus jorduware nou boe emeartorukare pudui duji dukodire ure ake ta tubiji tugiarigodure dukodi. Nono akore: – Kočare awu boe etaidure tu iro rakawo tuiorduwawo i rugadu. Boro! Iromodukare ia iro rakareuji rugadu! Pagare egoino. Etaidukare tumeartoruwo i rugadu.

<sup>13</sup> Dukodire uture epiji. Ure taredo ika kurireuto pugeje tugurugoduwo nou pobo maereu okwa ka.

### *Fariseu Doge Ero Pegareu Reo*

<sup>14</sup> Jesus ure jorduwadowuge ewiagodure tuwo tugeragu ia tuge amireuji pugeje. Dukodire

eke akedugodure. Eke amireure mitotu je nou ika kurireu tada. <sup>15</sup> Jesus makore ei. Akore: – Tawiapagado tawo tado tarugadu. Fariseu doge emeardae ure nono fermento mogadure. Herodes meardae ure nono fermento mogadure jamedu. Tameardaekaba nono nou emeardae mogadure.

<sup>16</sup> Dukodire nou Jesus ure jorduwadowuge emagore pui kaba jiba akoino nou fermento jiboeji. Egore pui: – Pawiagodure page amireu piji dukodire Pagimijera akoino pai.

<sup>17</sup> Jesus jorduware egojno pui duji. Nono unaragodure ei. Akore: – Kodiba tamagore pui nou tage amireu bokwaie duji? Kočare tarduwa bokware kimo? Tagaora rakare tarduwawo iwadaruji. <sup>18</sup> Taekure tarduwo irore jiboeji. Tawijare tamearduwo imagore jiboeji. Mare tawiagodure irore jiboe piji, imagore jiboe piji marigudu. <sup>19</sup> Ire boe eke rogu kado dukeje nou boe eke kodure kuri boe ekori. Ire boe enogwagedo nou boe eke roguji. Nou boe enodo padure cinco mil. Enogwagere dukeje tare boe eke kobo tugu kadaraboto boe etuwo tabo. Nuba tare korau kadarabo ure nou boe eke kobo tabo?

Egore: – Oto padure doze.

<sup>20</sup> Jesus makore ei pugeje. Akore: – Ča ia meri keje ire boe enogwagedo pugeje. Nou amireu ure sete. Ire kado boe etai pugeje du nou ime enodo padure quatro mil. Ča nuba tare korau kadarabo dogere nou boe eke kobo tabo?

Egore: – Oto padure sete.

<sup>21</sup> Jesus akore: – Kočare tarduwa bokware imeardae remawuji kana?

### *Jesus Ure Joku Bokwareu Imedu Pemegago*

<sup>22</sup> Jesus aregodure ture jorduwardowugebo Bet-saida ba kurireu ka. Nono ia boe etaregodure Jesus ae ia joku bokwareu imedu apo. Enogwamagudure Jesusji uwo tugera bu keje. <sup>23</sup> Jesus ure tugera bu nou joku bokwareu imedu ieraji. Uture apo toro nou ba kurireu piji tugigowo nou imeduji. Nono Jesus ure todoguru bu nou imedu joku keje. Nono Jesus ure tugera bu nou imedu keje jamedu. Dukejere unarare ji. Akore: – Ardure iaboeji?

<sup>24</sup> Nou imedu aiwore. Dukeje akore: – Uu. Iordure ia boei. Mare iorduwakare ei. Ere nono igurure tumeru tabo mato, toro, mato, toro, mato.

<sup>25</sup> Nono Jesus ure tugera bu nou imedu joku keje. Dukejere nou imedu aiwore pugeje. Care joku pemegagodure. Jordure boeji rugadu.

<sup>26</sup> Nono Jesus makore ji utuwo tuibagi tuwai ka. Akore: – Akaba akirimi ba kurireu ka. Atudo jii toro awai ka.

### *Pedro Akore Umode Boe Ekinorudowu Nuie Jesusče Rugadu*

<sup>27</sup> Dukejere Jesus uture ture jorduwardowugebo nou ba kurireu piji toro ia boe eda ka. Nou boe eda puredure Cesaréia Filipe ba kurireuji. Nou awaraji Jesus unarare nou ture jorduwardowugei. Akore: – Nuba boe emearaere i?

<sup>28</sup> Egore: – Boe egore João Batista nuie aki. Nouiage egore Elias nuie aki. Nouiage egore ia mariguduwu makore Pao Kurireu bataru jiwu nuie aki.



29 Nono Jesus unarare ei pugeje. Akore: – Tagi. Nuba tameardaere i?

Pedro akore: – Umode boe ekinorudowu nure aki rugadu.\*

30 Nono Jesus akore: – Tamagokaba awu tameardaere idu jiboeji boe ewiagai.

*Jesus Ure Ewie Tuwimode Duji*

31 Nono Jesus ure nou ture jorduwardowuge erduwado pugeje. Akore: – Imedu Onaregedu nure imi. Judeu doge eimijerage erdu pegamode i. Nou ure Judeu doge enomea maku Pao Kurireu aiwuge eimijerage erdu pegamode i. Jorduware Judeu doge eno bakaru jiwuge erdu pegamode i. Emode boe pegado i rugadu. Emode iwido. Mare merimode pobe metia bokware dukeje iewodumode pugeje.

32 Jesus mako pemegare nou tuwardaruji nou ture jorduwardowuge ewiagai erduwawo boe mode pudui duji. Mare Pedro aidukare nou Jesus bataruji. Ure tumegido Jesus apo kuri nono tumagowo ji. Akore: – Boe modukare aino ai.

33 Mare Jesus ure tumegido. Nono aiwore nou ture jorduwardowuge eiamedu boei. Dukejere mako rakare Pedroji. Akore: – Akaradai ikoda piji Satanás. Ameardae jire inagoino. Ameardaere nono boe emeardae mogadure. Boe emeardaekare nono Pao Kurireu meardae mogadure.

---

\* **8:29** 8.29 Grego bataru tabo egore “Cristo” aino. Dutabore egore umode boe ekinorudowu aino. Brae ewadaru remawu karega. Grego bataru rugadu. Hebreu bataru tabo egore “Messias” aino jamedu. Messias ure nono Cristo mogadure rugadu.

<sup>34</sup> Nono Jesus makore nou ture jorduwad-owuge ewagai ewo tuburedo pudui. Makore ia boe ewagai jamedu. Dukejere makore ei. Akore: – Ia tagi tagaidumode tameartoruwo i dukeje tagera ra taro pegareu piji, tawia ra tameardae pegareu piji, tagaidure jiboe piji. Tado tarugadu boe pegawo tai nono boe pegamode i dumogadure. Iwimode ipo padure pugajejewu keje. Dukodire inagoino tai tawo tado tarugadu tagoduwo itabo. <sup>35</sup> Boe ewiapagamode tuwo boe pemegado tu pudui turaga tabo dukeje nou boe eraga akedumode epiji rugadu. Egare remawu modukare. Emodukare tuginorudo bope doge eda kejewu joru pegareu piji rugadu. Mare boe ewiapagamodukare tumeardaeji pugeje tuwo tugera ra turo pegareu piji tumeardae pegareu piji tuwo tumagu inai tuwo boe erduwado iwu bakaru pemegareuji dukeje Pao Kurireu umode boe pemegado ei, umode egare remawudo rugadu. Nono ewarigudumodukare bope doge eda kejewu joru pegareuto jamedu. <sup>36-37</sup> Imedu umode toedo boe jamedu boeče. Mare nou oe umodukare imedu rutudo baruto. Ča nou imedu biagorokare tuwo tumeartorudo Pao Kurireuji. Biagorore tu tuwo toe kurido pagatu je. Mare paga karega inagoino. Boe emodukare turudu morido toe tabo. <sup>38</sup> Ro pegareuge emagare rugadu. Ro pegareuge tieribari tabowuge emagare rugadu. Mare ia boe epogurure tumagowo iwu bakaruji nou boe ewiagai dukeje imodukare ikeragu ei itae. Itaregodumode Pao Kurireu o jorugu pemegareu tabo Pao Kurireu utugarege baru tadawugebo dukeje imodukare ikeragu ei.

Nou Pao Kurireu o jorugu pemegareu urugure Pao Kurireu kujegajeje. Imode ikirimi mato dukeje urugumode nou aregodumode itabowu Pao Kurireu utugarege baru tadawuge ekujegajeje jamedu.

## 9

<sup>1</sup> Nono Jesus makore ture jorduwadowugei pugeje. Akore: - Iwo tawie. Pao Kurireu umode boe eimijera kurireudo pudumi dukeje aregodumode turaga tabo rugadu. Ia tagi tardumode awu inagoino jiboeji. Tawimodukare jii toro tardumode nou Pao Kurireu roino jitu ka.

### *Jesus Ure Tiedo Tuginai*

<sup>2</sup> Meri oto padure seis Jesusji pugeje. Nono ča uture Pedro apo, Tiago apo, João apo toro ia tori ričoreu ao ka. Tu emagere edure nono nou tori aogeje. Nono nou Jesus je ure tudo tuginai. Nou ure jorduwadowuge erdure ji rugadu. Mare Pao Kurireu koiare ure Jesus je udo tuginai. <sup>3</sup> Pao Kurireu ure Jesus ukudau areia kigadu maereudo ji. Kigadure rugadu kigadureboe jamedu boe kori. <sup>4</sup> Nono ča rore puku ei ime edure nono ebo. Eliare Moiseru edu nono tumago tabo Jesusji. <sup>5</sup> Nono Pedro makore Jesusji. Akore: - Ikimijera. Ure turugadu paeduwo woe. Čemode ia mačegradudo pobe metia bokware. Iamode akai. Iamode Moisés ai. Iamode Elias ai jamedu.

<sup>6</sup> Pedro, Tiago, João epagudugodure dukodire Pedro makore aino. Dukodire erduwakare tumagomode jiboeji.

<sup>7</sup> Nono ia boetugu ure turawuje etae. Nou boetugu ure taiado ebo. Nono emeardure ia boe emagoji nou boetugu piji. Akore: - Imeardu kurire jiwu itonaregedu reo. Tawiapaga pe-megado awu itonaregedu bataruji.

<sup>8</sup> Nono ere tie maedo mare erdukare ia boei pugeje. Tu emagere eragojere nono Jesus apo.

<sup>9</sup> Nono ere turawuje nou tori ao piji. Dukejere Jesus makore ei. Akore: - Tareadodukaba tardure jiboeji boe ewiagai. Imedu Onaregedu nure imi. Iewodumode pugeje dukeje tareadodumode awu tardure jiboeji boe ewiagai.

<sup>10</sup> Emeartorure awu Jesus bataruji. Mare puire enarare. Egore: - Nuburedu jiba akoino pai tuiewodumoduie pugeje?

<sup>11</sup> Dukodire enarare Jesusji. Egore: - Kodiba pawobe erduware Judeu doge eno bakaru jiwuge egore Elias aregodumoduie nou umode boe ekinorudowu otodai?

<sup>12</sup> Jesus akore: - Pao Kurireu makore boei marigudu Elias aregodumoduie boetoji rugadu. Umoduie boe ewie ewo tudo turugadu nou umode boe ekinorudowu aregoduwo etae rugadu. Mare Pao Kurireu bataru makore boei marigudu boe pegamoduie nou Imedu Onaregeduji. Boe etaidumodukaie nou Imedu Onaregeduji. <sup>13</sup> Mare inure tawie. Nou Pao Kurireu makore jiwu imedu Elias aregodure marigudu. João Batistare ema. Rore nono Elias ro mogadure. Mare boe etaidukare ji. Pao Kurireu ure boe ewie marigudu ainoie boemoduie nou Eliaji. Nou Pao Kurireu bataru jeture puidi rugadu João Batistaji.

*Jesus Ure Mareboe Meture Tadawu Iparedu Pemegago*

<sup>14</sup> Nono Jesus aregodure nouia ture jorduwad-owuge etae Pedro apo, João apo, Tiago apo. Boe emagare nono nou Jesus ure jorduwadowugebo. Ia jorduware Judeu doge eno bakaru jiwuge edure nono ebo jamedu. Etokire pui. <sup>15</sup> Boe erdure Jesusji dukeje egarere pudui. Nono eregodure togi. Ekimadure Jesus apo. <sup>16</sup> Mare Jesus unarare ture jorduwadowugei. Akore: – Kaba tawadaru jiba tagagoino nou jorduware Judeu doge eno bakaru jiwugei?

<sup>17</sup> Nono ia imedu rakoje boe etoiadada. Makore Jesusji. Akore: – Ikimijera. Itaregodure itonaregedu apo woe are jorduwadowuge etae. Bope uwari meture awu itonaregedu tada. Dukodire itonaregedu roiwakare tumagowo. <sup>18</sup> Nou bope uwari ro pegare itonaregeduji. Ure butudo moto ka. Nou itonaregedu jatara aregodure jabiji. Ure tora reko pui. Nono rakagodure. Inogwamagudure are jorduwadowugei ewo nou bope uwari pegareu barigu piji mare ero čekare ji.

<sup>19</sup> Jesus makore ei. Akore: – Tare ikiarigo. Tameartorukare rugadu. Iragoje raimodukare tagabo. Nuba tagaidure irowo tameartoruwo i?

Nono Jesus makore iagei. Akore: – Mato nou iparedu apo itae!

<sup>20</sup> Dukodire boe ere nou iparedu reko Jesus ae. Nou meture nou iparedu tadawu bope uwari jordure Jesusji dukeje ure nou iparedu butudo moto ka pugeje. Magadugodure moto keje. Nou iparedu jatara aregodure ja piji. Dukodire Jesus

makore nou iparedu uoji jamedu. <sup>21</sup> Akore: – Marigudu na nou bope roino akanaregeduji?

Nou iparedu uo akore: – Marigudu rugadu. Imedu rogu biagare tu je dutabore nou bope uwari roino ji jii aino. <sup>22</sup> Mai karega roino ji. Ure barigu joruto biwo joru tada. Dukeje ure barigu poboto biwo pobo tada. Inogwamagudunure ai. Akogududo čedabo. Aroiware dukeje awu itonaregedu pemegago.

<sup>23</sup> Jesus akore: – Uu. Mare ameartorumode rugadu dukeje aroiwamode boe jamedu boeji.

<sup>24</sup> Nou imedu aidure rugadu. Akore: – Imeartורה ai. Imeardae pegareu tawuje ipiji imeartoru raiwo ai rugadu.

<sup>25</sup> Jesus jordure nou boe emagare turegodu tabo mato pudae duji. Nono mako pegare nou meture nou iparedu tadawu bope uwariji. Akore: – Bope uwari nure aki. Mako bokwareu nure aki. Bija bokwareu nure aki. Atudo awu iparedu piji. Amodukare aremo to pugeje!

<sup>26</sup> Nou bope uwari kudugodure. Nono ure nou iparedu butudo moto ka pugeje. Mare ure tudawuje nou iparedu piji rugadu. Nono nou iparedu ure nono bireuboe mogadure. Nou boe egore: – Bire rugadu!

<sup>27</sup> Mare Jesus ure tugeragu nou iparedu ieraji. Dukejere ure udo turagojedo pugeje.

<sup>28</sup> Nono Jesus ure turemo ia baito. Nono nou ure jorduwadowuge enarare Jesusji. Egore: – Kodiba čeroiwakare čewo nou bope uwari tawuje nou iparedu piji?

<sup>29</sup> Jesus akore: – Boe emagomodukare baruto dukeje eroiwamodukare tuwo awu bope uwari tawuje boe epiji. Boe enogwamaguduwo baruto nono boe eroiwamode tuwo bope uwari tawuje piji. Ia boe eroiwamodukare tuwo tawuje rugadu.

*Jesus Ure Boe Ewie Tuwimoduie Tuiewodumuie Pugeje Jamedu*

<sup>30</sup> Jesus uture nou moto piji ture jorduwad-owugebo jii toro nou Galiléia moto ka. <sup>31</sup> Jesus meardaere tuwo tudaru kuri boe poru ka jao ture jorduwadowugebo tuwo erduwado nuba boemode pudui duji. Makore ei. Akore: – Imedu Onaregedu nure imi. Imagudumode ro pegareuge etai. Emode iwido. Mare merimode pobe metia bokware i dukejere iewodumode pugeje.

<sup>32</sup> Mare nou Jesus ure jorduwadowuge erduwakare nou Jesus makore jiboeji. Mare epagudure tunarawo Jesusji kaba jiba Jesus akoino pudui.

*Duboba Boe Eimijerage Mode Emage*

<sup>33</sup> Jesus aregodure Cafarnaum ba kurireu ka ture jorduwadowugebo. Ere turemo ia baito dukeje Jesus unarare ei. Akore: – Tagokire pui awaraji. Kaboba bagaiba tagagoino pui?

<sup>34</sup> Mare emagokare Jesus bataru jipagi. Eimedu boe etaidure tuwo boe eimijera kurireudo pudumi tumedage epiji. Dukodire etokire pui awaraji. Nono epogurure tumagowo tumeardae boeji Jesus biagai. Dukodire emagokare Jesus bataru jipagi. <sup>35</sup> Nono Jesus

ure tumugudo nou bai tada tumagowo nou ture jorduwadowugei mare jorduware emeardae boeji rugadu. Makore ei. Akore: – Boe eimijera meardaemode nono boe utugare meardae mogadure tuwo boe eimijera pemegareudo pudumi. Boe eimijera romode nono boe utugare ro mogadure tuwo boe eimijera ro pemegareudo pudumi.

<sup>36</sup> Nono Jesus ure tuggeragu ia boe etonaregedu roguji. Makore ji rakojewo nono boe etoiadada. Nono ukimadure apo dukeje makore nou ture jorduwadowugei pugeje. <sup>37</sup> Akore: – Boe emode tuggera podo boe etonaregedu apo inai itabore ere tuggera podo. Boe emode tuggera podo itabo ure itarego matowu apore ure tuggera podo jamedu.

### *Ro Pegakare Ćeiwuge Etaidure Ćei*

<sup>38</sup> João makore Jesusji. Akore: – Ćerdure ia imeduji. Ure bope doge etawuje boe epiji akie tabo. Ćemagore ji uwo tuggera ra nou turo piji. Ia are jorduwadowu karegure ema.

<sup>39</sup> Mare Jesus makore ei. Akore: – Piji. Umode bope tawuje boe epiji ikie tabo dukeje mako pegamodukare i. <sup>40</sup> Ro pegakare paiwuge emeardu kurinure pai. <sup>41</sup> Inure tawie. Ia boe erduware tameartorure i duji. Nono emode pobo maku tagai taguduwo ĉe dukeje Pao Kurireu umode boe pemegado ei rugadu eroino du moriče.

*Boe Etaidure Tuwo Boe Ekiripagado Ero Pegawo*



42 Jesus akore: - Boe emode tori kurireu kogudo ia boe ekidoru kajeje tuwo ewarigu poboto dukodire nou ewarigudure pobo towuge ewimode. Mare ia boe umode nou itore meartorure maibari iwuge edo tugera ra ipiji ero pegawo pugeje dukeje boe pegamode nou ure nou boe etore etaora pegadowuji rugadu. Jire boe pegareu kodumode nou barigudure pobo towuge ekori. 43-44 Boe etaidukare tugera kadoduwo tugana piji. Mare tagera umode taro pegado tameartorukawo i dukeje tagera kado tabiji. Mare tagera remawu ji karega inagoino. Tameardae pegareu jire inagoino tawo barigu tabiji. Mare paga karega. Tameartorumodukare i dukeje tawarigudumode bope doge eda kejewu joru maereuto. Nou joru akedumodukare rugadu. Tadumode toro dukeje boe pegamode tai rugadu jii toro rugadu. Mare tameartorumode i dukeje imode tarududo baruto. Tadumode toro dukeje boe pemegamode tai nono jii toro rugadu. Dukodire inagoino tai. Tagera umode mitotu je mare du inodu tabo tameartorure i dukeje tarudumode baruto rugadu tawikawo pugeje. 45-46 Boe etaidukare tuwure kadoduwo tubogora piji. Mare tawure umode taro pegado tameartorukawo i dukeje tawure kado tabogora piji. Mare tawure remawu ji karega inagoino. Tameardae pegareu jire inagoino tawo barigu tabiji. Mare paga karega. Tameartorumodukare i dukeje tawarigudumode bope doge eda kejewu joru maereuto. Tadumode toro dukeje boe pegamode tai rugadu jii toro rugadu. Mare tameartorumode i dukeje imode tarududo

baruto. Tadumode toro dukeje boe pemegamode tai nono jii toro rugadu. Dukodire inagoino tai. Tawure umode mitotu je mare du inodu tabo tameartorure i dukeje tarudumode baruto rugadu tawikawo pugeje. <sup>47-48</sup> Boe etaidukare tuioku bokwawo. Mare taeku umode taro pegado tameartorukawo i dukeje taeku tawuje tabiji. Mare taeku remawu ji karega inagoino. Tameardae pegareu jire inagoino tawo barigu tabiji. Mare paga karega. Tamodukare tagimijerado Pao Kurireučē dukeje tawarigudumode bope doge eda kejewu joru maereuto. Tadumode toro dukeje boe pegamode tai rugadu. Toro ate doge enogwagemode boei jii toro. Etagedumodukare. Toro joru umode boe ekowu jii toro. Nou joru akedumodukare jii toro rugadu. Mare tamode tameardae pegareu barigu tagaora piji tawo tagimijerado Pao Kurireučē dukeje boe pemegamode tai rugadu. Dukodire inagoino tai. Taeku umode mitotu je mare tameartorure i rugadu dukeje tarudumode baruto rugadu tawikawo pugeje.

<sup>49</sup> – Joru butumode boe eiamedu boe ewugeje. Nou joru umode boe pegareu kowu. Nou boe pemegareu jetumode.

<sup>50</sup> – Sal pemegare. Mare sal pegomode dukeje nou sal akedumode. Nono umodukare nono sal mogadure pugeje. Sal umode boe eke pemegado. Tarodo pui nono sal mogadure. Mare sal ji karega inagoino. Tagogududo tagabo. Taro pemegado pui tabemegawo pui rugadu.

# 10

## *Jesus Ure Boe Erduwado Ekawo Tugera Ra Toreduje Epiji*

<sup>1</sup> Nono Jesus uture nou moto piji toro Judéia moto ka. Kurugodure Jordão po kajeje. Boe emagare taregodutabo Jesus ae pugeje. Dukodire Jesus ure erduwado nono turo mogadure.

<sup>2</sup> Ia fariseu doge etaregodure Jesus ae jamedu. Etaidure tuwo turokogado Jesusji tuiorduwo ia Jesus ro pegareuji ia Jesus mako pegareuji. Erdumode dukeje emago pegamode ji rugadu. Dukodire enarare Jesusji. Egore: - Nuba Pao Kurireu ure maku Moisés aiwu pago bakaru akore? Ukana turugadu imedu uwo toreduje utudo tubiji tumugukawo apo pugeje?

<sup>3</sup> Jesus makore ei. Akore: - Nuba nou mariguduwu Moisés ure maku pagaiwu bakaru akore?

<sup>4</sup> Nou fariseu doge egore: - Moisés makore mariguduwuge pawobei. Nou bakaru akore imedu aiduie tuwo tugera ra toreduje piji dukeje uwo ia bapera atugodo tuwo toreduje bie kaba kodiba tuie tugera ra toreduje piji rugadu. Imedu romoduie aino du pegakaie. Uwo toreduje utudo tubiji rugadu. Ainore nou jorduware Pao Kurireu bataru jiwu akore pawobei marigudu.

<sup>5</sup> Jesus akore: - Uu. Nou mariguduwuge pawobe etaora rakare dukodire etaidukare tuiorduwwawo, etaidukare turo pemegawo. Dukodire Moisés ure nou paro maku mariguduwuge pawobe etai ewo tugera ra toreduje piji. <sup>6</sup> Mare ukare aino boetoji. Pao Kurireu ure baru to.

Ure moto to. Dukejere ure imedu boetojiwu towuje. Ure aredu boetojiwudo towuje oreduječe. Ainore Pao Kurireu bataru padure bapera kejewure.\* <sup>7</sup> Dukodire imedu utumoduie tuo piji tuje piji tumuguwo toreduje apo dukeje emodukaie pobe pugeje, emoduie mitotu je rugadu. <sup>8</sup> Dukodire imedu mugumode aredu apo dukeje ere mitotu puapo turoi pui dutabo Pao Kurireu jakai. Ainore Pao Kurireu bataru padure bapera kejewure.† <sup>9</sup> Ča Pao Kurireu aidure emugure puapo duji. Dukodire emuguwo puapo jii toro rugadu. Ekawo tugera ra pubiji rugadu.

<sup>10</sup> Nono Jesus uture ia bai ka ture jorduwadowugebo. Ere turemo dukeje nou ure jorduwadowuge enarare Jesusji nou Jesus bataru bagai. <sup>11</sup> Jesus makore ei. Akore: – Imedu umode tugera ra toreduje piji mare mugumode ia aredu apo pugeje. Du pegare Pao Kurireu jakai. Nou imedu ro peganure nou toreduje boetojiwudoji rugadu. Ure tudo nono jeribarire toreduje pijiwu mogadure Pao Kurireu jakai. <sup>12</sup> Aredu jamedu umode tugera ra toredu piji mare mugumode ia imedu apo pugeje. Dutabore ro peganure nou toredu boetojiwuji rugadu. Ure tudo nono jeribarire toredu pijiwudo mogadure Pao Kurireu jakai.

### *Jesus Ure Tuwadaru Pemegareu Bu Boe Etoře Ewugeje*

---

\* **10:6** 10.6 Awu bataru padure Gênesis 1.27 keje. † **10:8** 10.8 Awu bataru padure Gênesis 2.24 keje.

<sup>13</sup> Ia boe etaregodure torebo Jesus ae Jesus uwo tugera bu nou boe etore ewugeje. Mare nou Jesus ure jorduwadowuge etaidukare eroino duji. Emagore nou boei etaregodukaiago torebo Jesus bagai. <sup>14</sup> Jesus jorduware nou inoduji dukodire korigodure nou ture jorduwadowugei. Akore: – Tagaba tawu boe etore ekajeje etaregoduwo itae. Etarego itae rugadu. Boe ewo tumeardae udo nono boe etore emeardae mogadure tuwo tugimijerado Pao Kurireuče rugadu turuduwo baruto. <sup>15</sup> Boe jokodu jire inagoino tai. Boe etore emeartorure tuo tuje makore jiboeji. Mare boe etore ji karega inagoino. Boe ewo tugimijerado Pao Kurireuče tumeartoruwo Pao Kurireu bataruji. Dujire inagoino. Boe emeartorumode Pao Kurireuji dukeje emugumode Pao Kurireu apo jamedu. Mare emeartorumodukare Pao Kurireuji dukeje emugumodukare Pao Kurireu apo pugeje.

<sup>16</sup> Nono Jesus ure tona bu nou boe etore ekajeje. Nono ure tugera bu ewugeje. Ure tuwadaru pemegareu bu ewugeje jamedu.

### *Imedu Oe Kurire*

<sup>17</sup> Nono Jesus uture nou boe epiji pugeje. Merure awaraji dukeje ia imedu rekodure Jesus rekodaji aidure tumagowo ji kodi. Aregodure Jesus ae dukeje ure tubu jodo moto keje Jesus bure paru. Makore Jesusji. Akore: – Jorduwareu pemegareu nure aki. Nuba iromode iewoduwo pugeje imuguwo baru tada Pao Kurireu apo du akedukawo?

<sup>18</sup> Jesus akore: – Ča akagore pemegareu nuie imi. Mare tu Pao Kurireure pemegare tu rugadu.

Arduwa kana Pao Kurireu nuie imi rugadu? Aino čare ameardae pemegado amearторуwo i rugadu. <sup>19</sup> Marigudu arduware nou Pao Kurireu ure maku Judeu doge etaiwu bakaruji. Ure maku etai marigudu. Pao Kurireu akore: “Akaba boe ewido. Aeribarikaba akoreduje piji akoredu piji. Akiwogukaba. Awadrarodukaba boe erore jiboeji. Akaba boe ekiripagado jamedu. Ameartorudo aoji ačejj jamedu.”<sup>‡</sup>

<sup>20</sup> Nou imedu akore: – Uu. Iparedurogu ure imi dutabore imeartורה awu bataru jamedu boeji ji aino.

<sup>21</sup> Jesus aiwore tu nou imeduji. Meardu kurire nou imeduji. Nono makore ji. Akore: – Iaboe kimore arowo ji. Akoe jamedu boe maku diero bagai. Nou ako diero rugadu maku marenarue doge etai. Dukeje Pao Kurireu umode akoe kurido baru tada. Aromode aino dukeje akaregodumode itae pugeje akoduwo itabo.

<sup>22</sup> Nou imedu meardure Jesus bataruji dukeje kiarigodure. Oe kurire dukodire aidukare tuwo toe maku. Je kiarigodure. Kodire uture Jesus piji. Meartorukare Jesus bataruji.

<sup>23</sup> Jesus aiwore tumebiji ture jorduwardowuge ewagai. Makore ei. Akore: – Kočare. Boe rakare oe kurireugei etaiduwo tuwo tugimijerado Pao Kurireučē tumuguwo Pao Kurireu apo baru tada. Oe kurireuge etaidure tumeartoruwo tu toeji tuwo činorudo.

<sup>24</sup> Nou ure jorduwardowuge erore ta je nou Jesus bataru keje. Mare Jesus makore ei

---

<sup>‡</sup> **10:19** 10.19 Awu bataru padure Êxodo 20.12 keje, Deuteronomio 5.16-20 keje jamedu.

pugeje. Akore: – Itore nure tagi. Boe rakare oe kurireugei etaiduwo tuwo tugimijerado Pao Kurireuče rugadu. <sup>25</sup> Boe rakare oe kurireu imeduji uwo tugimijerado Pao Kurireuče tumuguwo apo nono boe rakare cameloji uwo turemo agulha poroto dumogadure.

<sup>26</sup> Nono Jesus ure jorduwardowuge erore ta je. Eгоре pui: – Kočare. Ioguduba umode činorudo tuiewoduwo pugeje tumuguwo Pao Kurireu apo?

<sup>27</sup> Jesus aiwore tu ei. Dukeje akore: – Boe eroiwakare tuwo činorudo rugadu. Mare Pao Kurireu roiware tuwo boe ekinorudo rugadu. Pao Kurireu rakare tuwo boe jamedu boe pegado boei.

<sup>28</sup> Nono Pedro akore: – Akaiwodo. Čere čegera ra čenoe jamedu boe piji čegoduwo akabo.

<sup>29-30</sup> Nono Jesus makore ei. Akore: – Uu. Mare iwo tawie boe remawuji. Boe emode tugera ra tuwai piji, tuo piji, tuje piji, tumanamage epiji, tuwiamage epiji, to boepa piji tugoduwo itabo tuwo boe ewie iwadaru pemegareuji dukeje boe rugadu boe makudumode etai awu moto keje. Ewai kurimode. Etumana mage emagamode. Etuwie mage emagamode. Etuje mage emagamode. Etoře emagamode. Eno boepa kurimode. Mare ro pegareuge ero pegamode ei pugeje. Mare ia meri keje eewodumode pugeje emuguwo baru tada jii toro rugadu. Ewimodukare pugeje rugadu. <sup>31</sup> Boe emeardae pemegare oe kurireugei dukeje eгоре boe eimijerage nuie emage mare emeartorumodukare Pao Kurireuji dukeje marenarue doge mode emage. Iage

enoe bokware dukodire boe emeardae pegare ei mare emeartorumode Pao Kurireuji dukeje oe kurireuge mode emage toro ia meri keje.

*Jesus Ure Boe Ewie Pugeje Tuwimoduie*

<sup>32</sup> Jesus uture Jerusalém kawu awaraji ture jorduwardowugebo tuduwo Jerusalém ba kurireu ka. Enodo padure doze. Jesus kodure etododai. Nou ure jorduwardowuge epagudure Jerusalém tadawu boe eimijerageče. Ia boe ekodure eregodaji jamedu. Nou kodure eregodajiwuge epagudure nou boe eimijerageče jamedu. Dukodire Jesus ure tuwuredo. Makore tu nou ture jorduwardowugei nuba boemode pudui duji. <sup>33</sup> Akore: – Tawiapagado iwadaruji. Padumode Jerusalém ba kurireu ka. Imedu Onaregedu nure imi. Imagudumode nou ure Judeu doge enomea maku Pao Kurireu aiwuge eimijerage etai. Imagudumode nou jorduware Judeu doge eno bakaru jiwuge eimijerage etai. Nou boe eimijerage egomode ipegaie. Etaidumode tuwo iwido rugadu. Dukodire emode imagu boe tuginaiwuge ekimijerage etai. <sup>34</sup> Nou boe ekadakagirimode i. Emode todoguru to i. Emode boeto i bukigu tabo. Emode iwido. Mare merimode pobe metia bokware i dukeje iewodumode pugeje.

*Tiago, João Enogwamagudumode Jesusji Uwo Tumeardae Towuje*



<sup>35</sup> Nono Zebedeu ore ime emagore Jesusji. Ia iere Tiago. Uwie iere João. Emagore Jesusji. Egore: - Čegimijera kurireu nure aki. Čedaidure awo iaboe towuje čenai.

<sup>36</sup> Jesus akore: - Nuba tagaidure irowo tai?

<sup>37</sup> Egore: - Boe ekimijera kurireu mode aki dukeje boe pemegamode ai rugadu. Amugumode ira kurireu keje nono boe ekimijerage ero mogadure. Dukejere čedaidure čewo čemugudo amegi boe eimijera mugure kejewu ira keje jamedu. Ia čegi čedaidure čemuguwo ira keje akana pemegareu jagwai. Ia čedaidure čemuguwo akana pegareu jagwai jamedu.

<sup>38</sup> Jesus makore ei. Akore: - Tarduwakare kaba багайба tagagoino. Boe pegamode tai nono boe pegamode i dumogadure dukeje taroiwakana tawo taragado tai tagawo tagera ra tameartorure idu piji kana?

<sup>39</sup> Egore: - Uu. Čemode čeragado čei.

Jesus akore: - Inure tawie. Boe pegamode tai rugadu nono boe pegamode i dumogadure.

<sup>40</sup> Mare iroiwakare iwo tamugudo itabo ikana pemegareu jagwai, ikana pegareu jagwai. Pao Kurireu emare ure nou imegiwu pemegado. Tu ema jorduware turomode jiboeji. Emare umode taidure jiwuge emugudo ikana pemegareu jagwai, ikana pegareu jagwai.

<sup>41</sup> Nouia Jesus ure jorduwardowuge enodo padure dez. Emeardure nou Tiago nou João enogwamagudure jiboeji dukeje ekorigodure nou tumedage pobedu dogei. <sup>42</sup> Dukodire Jesus makore nou ture jorduwardowuge eiamedu boe

ewagai. Enodo padure doze. Jesus makore ei. Akore: – Tarduware boe tuginaiwuge eimijerage erore jiboeji. Ero rakare boei. Boe emeartorure tugimijeragei rugadu. Emeartorumodukare ei dukeje nou boe ekimijerage emode boe pegado nou meartorukare puduiwugei rugadu. <sup>43-44</sup> Ča tarokaba nono nou boe eimijera kurireuge ero mogadure. Ia tagi tagaidumode tawo boe eimijerado tagi dukeje tameardae udo nono boe utugare meardae mogadure tawo boe eimijera pemegareugedo tagi. Boe eimijera romode nono boe utugare ro mogadure tuwo boe eimijera pemegareudo pudumi. <sup>45</sup> Ainore irore rugadu. Imedu Onaregedu nure imi. Mare itaregodukare iwo boe ekimijerado imi. Itaregodure iwo boe etugaredo imi. Itaregodure iwo imagu boe etai. Itaregodure iwiwo boe ero pegareu moriče.

### *Jesus Umode Joku Bokwareu Imedu Pemegago*

<sup>46</sup> Etaregodure Jericó ba kurireu ka. Nono Jesus uture nou ba kurireu piji ture jorduwad-owugebo. Ia boe ekodure awaraji Jesus apo jamedu. Emagare rugadu. Nono ia imedu joku bokwareu mugure nou awara okwai. Iere Bartimeu. Timeu onaregedu nure ema. Okwamagadure boei nono tuge rogu bagai meri jamedu boeji. <sup>47</sup> Meardure Jesus kodure tugini duji. Dukodire kudugodure Jesus rekodaji. Akore: – Jesus! Davi Onaregedu nure aki! Akogududo itabo!

Nou joku bokwareu imedu jorduware Davi uwobe nure Jesus če duji kodire akoino Davi Onaregedu nure ema.

<sup>48</sup> Boe emagare nono apo. Emago pegare ji mugu kiorowo. Mare kudugodu rakare pugeje. Akore: – Davi Onaregedu nure aki! Akogududo itabo marenaru nure imi!

<sup>49</sup> Jesus ure tuwuredo. Akore: – Mato apo itae.

Nono nou boe emagore nou joku bokwareu imeduji. Eгоре: – Ča. Akiarigodukaba pugeje. Jesus makore awagai. Aragojedo.

<sup>50</sup> Dukodire ure tugudau areia biaku epa barigu tubiji tuwo tugera jodo mototo tuwo turagojedo. Uture Jesus ae.

<sup>51</sup> Jesus makore ji. Akore: – Kaba jiba akaidure irowo ai?

Nou joku bokwareu imedu akore: – Ikimijera nure aki. Itaidure itaiwowo pugeje.

<sup>52</sup> Jesus akore: – Ča. Ameartorure i dukodire ire apemegago akaiwowo pugeje. Atudo aibagi awai ka.

Jesus makore dukeje nou imedu aiwore pugeje tači je. Aiwore pugeje rugadu. Nono kodure Jesus rekodaji nou awaraji.

## 11

*Boe Egaremode Jesus Aregodure Jerusalém Ba Kurireu Ka Duji*

<sup>1</sup> Jesus ure taregoduiago Jerusalém ba kurireu ka ture jorduwadowugebo. Epuredugodure boe eda Betfagé ka. Epuredugodure boe eda Betânia ka jamedu. Nou boe eda Betfagé, nou boe eda Betânia eragoje puredure Oliveira Riji. Dukejere Jesus makore ture jorduwadowuge ime pobedu dogei tuwo etudo tododai. <sup>2</sup> Jesus

makore ei. Akore: - Tadudo toro nou boe eda ka. Tagaregodumode toro dukeje tardumode ia jumenta onaregeduji. Boe ere kogudo nono duji. Nou jumenta rakoje ere nono mare ia boe ekare tumugudo keje ji aino. Tamode bukigu kiwuje dukeje tadumode mato apo itae. <sup>3</sup> Ia boe enaramode tai kaba kodiba taroino apo. Tamagodo ei Boe Eimijera aiduie ji. Tumoduie reko tuibagi kuri je.

<sup>4</sup> Dukodire nou ime pobedu doge eture nou boe eda ka. Erdure nou jumenta onaregeduji nono Jesus bataru mogadure. Kogure ia bai poro keje. Ere nou bukigu kiwuje dukeje ia boe enarare ei. <sup>5</sup> Egore: - Mure kodiba tamode tageragu nou jumenta onaregeduji?

<sup>6</sup> Nou ime pobedu doge emagore nou Jesus makore puduiboie tabore emagore nou boe ewadaru jipagi. Dukodire nou boe emago pegakare etuwo apo. <sup>7</sup> Etaregodure Jesus ae nou jumenta onaregedu apo dukeje ere padure tuwugejewu tugudau areia boe bu nou jumenta onaregedu poru keje. Nono Jesus ure tumugudo nou jumenta keje. <sup>8</sup> Boe emagare nono. Ere padure tuwugejewu areia boe bu nou Jesus kodure jiwu awaraji. Ia boe ere bai kado. Ere nou bai bu awara keje jamedu. <sup>9-10</sup> Boe emagare rugadu tugodu tabo Jesus apo. Eture tiegarere pudui dutabo rugadu. Dukodire ewadodu rakare Pao Kurireu ie tabo. Egore: - Pao Kurireu pemegare! Pagimijera reo! Pameartoruwo ji nono mariguduwuge pao mage emeartorure tugimijera kurireu Davi jitu mogadure. Pao Kurireu ure arego mato pagae. Uwo boe pemegado ji

rugadu! Boe eiamedu boe emago pemegawo ji rugadu moto keje, baru tada jamedu.

<sup>11</sup> Jesus aregodure Jerusalém ba kurireu ka dukeje uture Pao Kurireu uwai ka. Ure turemo dukeje aiwore boe parugajeje boe jamedu boeji. Mare merirekodure dukodire uture pugeje. Uture Betânia ba kurireu ka tuibagi pugeje ture jorduwadowugebo. Enodo padure doze.

### *Jesus Mako Pegare Ia Figo Iji*

<sup>12</sup> Nou barogwato Jesus utuiago tuibagi boe eda Betânia piji ture jorduwadowugebo. Mare Jesus uke boeire ji. <sup>13</sup> Jesus aiwo jaere dukeje jordure ia figo iji. Nou figo i arure rugadu. Dukodire uture ka taiwowo tudu kurodureu bagai. Mare jordukare boeji. Jordure tu nou aruji. Nou i tudumodukare nou ariji. <sup>14</sup> Nono Jesus mako pegare nou figo iji. Akore: - Boe emodukare akurodu kowuje pugeje awimode kodi.

Nou Jesus ure jorduwadowuge emeardure nou Jesus akoe nou figo i jituji.

### *Jesus Ure Turemo Pao Kurireu Uwaito*

<sup>15</sup> Etaregodure Jerusalém ba kurireu ka pugeje. Jesus uture Pao Kurireu uwai ka. Ure turemo nono. Jordure nou boei ere tagu ie metugoe emagu diero bagai duji, ere diero maku puai duji. Dukodire korigodure. Ure nou boe enoe rugadu barigu. Ure emugure kejewu ira rugadu boe barigu. Ure nou metugoe meture tadaboe rugadu barigu. Ure nou boe etudo Pao Kurireu uwai piji rugadu. <sup>16</sup> Makore boe eiamedu boei etaregodukawo toe tabo pugeje Pao Kurireu uwai ka. <sup>17</sup> Nono makore boei

tuwo erduwado. Akore: – Moto rugadu boe kejewuge etaregoduwo awu Pao Kurireu uwai ka tumagowo Pao Kurireu bagai baruto. Ainore Pao Kurireu akore. Ainore bapera atugo ure.\* Mare tare awu Pao Kurireu uwai udo nono iwogureuge ewai mogadure.†

<sup>18</sup> Nou ure Judeu doge enomea maku Pao Kurireu aiwuge eimijerage emeardure nou inoduji. Nou jorduware Judeu doge eno bakaru jiwuge emeardure nou inoduji jamedu. Dukejere eiamedu boe ekorigodure Jesusji. Etaiwore ia tumeardae bagai tuwo Jesus bito. Mare boe doge etaidure Jesusji. Egaregodure pudui Jesus rore jiboeji, makore jiboeji. Dukodire nou boe eimijerage epagudure turo pegamode Jesus jituji tumode nou boe doge ekorigo pudui dukodi.

<sup>19</sup> Merirekodutabo Jesus uture Jerusalém ba kurireu piji ture jorduwadowugebo.

### *Erdumode Nou Figo Iji Pugeje*

<sup>20</sup> Nou barogwato ča je Jesus merure awaraji pugeje ture jorduwadowugebo. Nono erdure nou figo iji pugeje. Ma kočare nou figo i bire rugadu. <sup>21</sup> Nono Pedro biabuture Jesus makore jiboe keje. Dukodire makore Jesusji. Akore: – Akaiwodo. Awu amago pegare jiwu figo i bire rugadu.

<sup>22</sup> Jesus akore: – Tameartorudo Pao Kurireuji. <sup>23</sup> Boe jokodu jire inagoino tai. Tamororama-gadukaba. Tameartorudo rugadu. Tameartorumode dukeje tamagomode nou tori riji uwo

---

\* **11:17** 11.17 Awu bataru padure Isaiás 56.7 keje. † **11:17** 11.17 Awu bataru padure Jeremias 7.11 keje.

tuwarigu pobo maereuto. Tamagomode ji dukeje barigudumode pobo maereuto rugadu. Mare tameartorumodukare dukeje umodukare tuwarigu. <sup>24</sup> Dukodire tamagomode Pao Kurireu bagai baruto iaboe bagai, tameartorumode makudumode tagai duji dukeje Pao Kurireu umode tamagore bagaiboe maku tagai rugadu. <sup>25-26</sup> Tamagomode baruto dukeje tawiagodudo boe ero pegare taidu piji. Dukodire baru tadare Pao Kurireu biagodumode taro pegare jiboe piji jamedu.

*Boe Enarare Jesusji Ioguduba Ure Turaga Maku Ai*

<sup>27</sup> Jesus aregodure Jerusalém ba kurireu ka pugeje ture jorduwadowugebo. Jesus merure Pao Kurireu uwai kurireu oiagi. Nono nou ure Judeu doge enomea maku Pao Kurireu aiwuge eimijerage, nou jorduware Judeu doge eno bakaru jiwuge, nouia Judeu doge eimijerage eiamedu boe etaregodure Jesus ae jamedu. <sup>28</sup> Eiamedu boe emagore Jesusji. Eгоре: – Ioguduba ure turaga maku akai aro rakawo aino?

<sup>29</sup> Jesus makore ewadaru jipagi. Akore: – Inaramode tai iaboeji jamedu. Tamagomode iwadaru jipagi dukeje imagomode tawadaru jipagi. <sup>30</sup> Ća ioguduba ure João Batista udo boe etao pegodo? Pao Kurireu koia kana? Ia boe eigoia kana? Nuba tameardaere? Tamagodo.

<sup>31</sup> Mare nou boe eimijerage erduwakare tumagowo Jesus bataru jipagi. Dukodire emagore pui nuba tagomode Jesus bataru jipagi. Eгоре: –

Pamagomode Pao Kurireu koiaie ure João Batista udo boe etao pegodo mare pameartorukare nou inoduji. Awu Jesus jorduware pameartorukare nou inodu jituji. Dukodire pagagomode aino dukeje Jesus umode pawadaru pogurudo. Akomode: “Kodiba tameartorukare ji?” Ainore akomode pai. <sup>32</sup> Mare pagagomodukare boe eigoiaie.

Boe eiamedu boe emeartorure João Batista makore Pao Kurireu bataru jituji. Egore Pao Kurireu koiare ure João Batista udo boe etao pegodo. Dukodire nou boe eimijerage epagudure tumago pegawo João Batista rore jiboeji tumode boe ekorigo puidi dukodi.

<sup>33</sup> Nono nou boe eimijerage emagore Jesusji. Egore: – Čerduwakare ioguduba koiare ure João Batista udo boe etao pegodo.

Nono Jesus makore ei. Akore: – Ča tamagokare iwadaru jipagi dukodire imagomodukare ioguduba ure itarego mato jamedu.

## 12

### *Ro Pegareuge Etu Pemegawo Boepaji*

<sup>1</sup> Jesus readodure ia bakaruji boe ewiagai tuwo ewie Pao Kurireu meardae remawuji. Akore: – Marigudu ia imedu ure uva tugu to boepa tada. Ure ramiku aiado to boepa tabo. Ure ia moto porodo tuwo tuwuredo nou uva kurodu keje tuwo kuru tawuje. Ure ia tugamo pemegado boe ewo tumugudo toro aogeje taiwo pemegawo boepaji. Nono ure tugeragu ia boei tuwo etudo nou to boepaji emaragoduwo ji. Nono nou ore



boepa čewu uture epiji tugiriadu tabo toro ia boe eda jaereu ka. <sup>2</sup> Nou boepa tadawu uva kurodumode kejewu ari puredugodure dukeje nou ore boepa čewu ure tudugare utudo toro nou jeture to boepa jiwuge boe etae nou tugiriadure kawu moto piji. Ure nou tudugare utudo uwo tugeragu nou makudumode pudaiwu boeji. Nou jeture nou boepa jiwuge emode uva rugadu kado dukeje emode ia kado puiato nou ore boepa čewu imedu ai. <sup>3</sup> Ča nou utugare aregodure nou boepa ka. Mare nou jeture boepa jiwuge etaidukare tuwo uva kado puiato pugeje nou ore boepa čewu imedu ai. Dukodire ere tugeragu nou ore boepa čewu utugareji. Ere boeto ji. Dukeje ere utudo tuibagi tugimijera ae tugera kedo tabo. <sup>4</sup> Nono nou ore boepa čewu ure ia tudugare utudo etae pugeje. Mare nou jeture boepa jiwuge ere boeto nou utugareji pugeje. Ere boeto aoraji. Ero pegare ji rugadu. Ere utudo tuibagi tugera kedo tabo pugeje. <sup>5</sup> Nono nou ore boepa čewu ure ia tudugare utudo etae pugeje. Mare ere nou utugare bito. Nou ore boepa čewu ure tudugarege emagado toro etae rugadu. Mare nou jeture boepa jiwuge ero pegare nou ore boepa čewu utugarege eiamedu boei. Ere boeto ei. Ere iage ewido. <sup>6</sup> Nono nou ore boepa čewu onaregedu imedu ure mitotu je. Meardu kurire nou tonaregeduji rugadu. Čare ure nou tonaregedu utudo toro nou jeture boepa jiwuge ewagai aino boigodu. Nou ore boepa čewu akore: “Emeartorumode itonaregeduji rugadu.”

<sup>7</sup> – Mare nou jeture boepa jiwuge emagore pui.

Egore: “Awu ore boepa čewu onaregedu reo. Emare omode tuo oe jamedu boeče. Pawo bito pagowo awu uo o motoče.”

<sup>8</sup> – Dukodire nou jeture boepa jiwuge ere tugeragu nou ore boepa čewu onaregeduji. Ere bito. Ere barigu toro nou boepa piji.

<sup>9</sup> Jesus mako kimore nou boei. Akore: – Ainore erore rugadu. Ča. Nuba nou ore boepa čewu romode nou jeture boepa jiwugei? Aregodumode etae. Umode ewido. Nono umode to boepa maku iage etai etuwo ji pugeje. <sup>10</sup> Mare tagaiwokare rugadu ia padure bapera kejewu Pao Kurireu bataruji kana? Ainore awu Pao Kurireu bataru akore:

– Boe emeardae pegare ia toriji. Egore pe-gaie tuwo tuwaido ema.\* Mare nou tori pemegareu nure ema rugadu boe ewo tuwaido ema rugadu.

<sup>11</sup> – Pao Kurireu koiare ure nou tori pemegado aino. Ure pemegado nouia tori jamedu boe ekori. Boe eiamedu boe ebogodure nou Pao Kurireu roino duji.†

<sup>12</sup> Judeu doge eimijerage emeardure Jesus akoino jiboeji dukeje erduware puduire Jesus akoino duji.‡ Dukodire etaidure tuwo tugeragu Jesusji tuwo tugu baičoreuto kuri je rugadu. Mare boe etaidure Jesusji. Dukodire nou boe

---

\* **12:10** 12.10 Tori tabore nou boe ere tuwai towuje. Mare etaiwore tu tori pemegareuge ewagai tuwo tuwai pemegado tabo.

† **12:11** 12.11 Awu bataru padure Salmo 118.22-23 keje. ‡ **12:12** 12.12 Akaiwodo Mateus 21.45-46 kejewu anexo tadawu bataru roguji.

eimijerage epagudure, eroiwakare tuwo tuger-  
agu Jesusji. Dukodire eture piji.

*Boe Ewo To Imposto Mori Maku Roma Kejewu  
Boe Eimijera Kurireu César Ai*

<sup>13</sup> Judeu doge eimijerage ere fariseu doge etudo Jesus ae. Ere ia aidure Herodes jiwuge etudo Jesus ae jamedu. Judeu doge eimijerage emagore nou boei etuwo Jesus ae tunarawo ji tuwo Jesus barigu boeto tagoino jiboeji. <sup>14</sup> Dukodire etaregodure Jesus ae. Emagore Jesusji. Eгоре: – Boe eimijera nure aki rugadu. Akare awadaru udo paga boei. Ameardaere boei boe remawu tabo. Boe jokodu jire akagoino. Awiapagakare boe ewadaru pegareuji. Ameardaere Pao Kurireu meardaeji. Are boe erduwado Pao Kurireu meardaeji tu tu je. Awiapagakare ia boe emeardae pegareuji rugadu. Ča. Nuba pago bakaru umode parduwado paromode jiboeji? Pamode pagoe imposto mori maku Roma kejewu boe eimijera kurireu César ai na? Pamode maku kana? Pamodukana maku kana?

<sup>15</sup> Mare Jesus jorduware emeardae pegareuji. Jorduware emeartorukare tuwadaruji. Akore: – Kaba kodiba tagaidure tawo iwarigu boeto tagagoino idu tabo? Ia imposto morireu diero tori maku inai iorduwo ji.

<sup>16</sup> Ere ia diero tori maku Jesus ai. Nono Jesus akore: – Ioguduba je ba padure awu diero tori keje? Ioguduba ie ba padure awu diero tori keje?

Eгоре: – Roma kejewu boe eimijera kurireu César ie padure keje.

<sup>17</sup> Nono Jesus akore: – Boe rugadu. Čare César oeboe maku César ai. Mare Pao Kurireu oeboe maku Pao Kurireu ai jamedu.

Nou boe emeardure Jesus akoino duji dukodire erore ta je akoino pudui duji.

### *Ia Boe Eimijerage Enarare Jesusji Pugeje*

<sup>18</sup> Nono ia saduceu doge etaregodure Jesus ae tuwo Jesus barigu boeto tagoino jiboeji jamedu. Nou saduceu doge emeardaere boe eewodumodukaie pugeje. Nono emagore Jesusji.

<sup>19</sup> Egore: – Jorduwareu imedu nure aki. Ča mariguduwu makore Pao Kurireu bataru jiwu Moisés ure jaoboe ero maku etai pameartoruwo ji jii aino rugadu. Akore imedu bimoduie mare ore bokwaie dukeje nou imedu uwie muguwo nou tumana bireu oreduje apo torewo nou bireu tumana ai. <sup>20</sup> Ča ia meri keje ime enodo padure sete. Etumana etuwie mage nure pugi. Etumana mugure ia aredu apo. Mare čare bire. Mare ore bokware. <sup>21</sup> Dukodire nou uwie imedu mugure nou aredu apo. Mare nou imedu bire jamedu. Etoe bokware. Nono uwie imedu mugure nou aredu apo jamedu. Mare bire jamedu. <sup>22</sup> Dukodire nou uwie ime eiamedu boe emugure nou aredu apo rugadu. Mare eiamedu boe ewire. Etoe bokware. Dukeje čare nou aredu bire jamedu. <sup>23</sup> Dukodire čedaidure čenarawo ai. Pao Kurireu umode eewodudo pugeje dukeje duboba mugumode nou aredu apo? Eiamedu boe emugure apo moto keje mare duboba mugumode nou aredu apo baru tada?

24 Jesus makore nou boe ewadaru jipagi. Akore: – Tarduwa bokware. Tarduwakare Pao Kurireu bataru padure kejewu baperaji. Tarduwakare Pao Kurireu ro rakareuji. 25 Bireuge eewodumode pugeje dukeje emode nono Pao Kurireu utugarege baru tadawuge emogadure. Etuwiremodukare. Etugogemodukare. 26 Mare tameardaere boe eewodumodukaie pugeje. Tagaiwokare Moisés ure bu bapera kejewu Pao Kurireu bataruji? Pao Kurireu ure Moisés jordudo pudui ia enado i piji. Joru čere nou enado ito mare nou joru ukare nou enado i kowu. Nou enado i pijire Pao Kurireu makore Moisesji. Akore: “Abraão meartorure jiwu Pao Kurireu nure imi. Isaque meartorure jiwu Pao Kurireu nure imi. Jacó meartorure jiwu Pao Kurireu nure imi.”§ 27 Pao Kurireu makore jiwu ime ewire marigudu. Mare Pao Kurireu makore emeartoruie pudui rugadu. Dukodire parduware eewodure pugeje duji. Bireuge emeartorumodukare Pao Kurireuji. Eewodureuge emeartorumode ji. Dukodire tameardae ukare turugadu. Boe eewodumode pugeje rugadu.

### *Pao Kurireu Bataru Kurireu Reo*

28 Ia jorduware Pao Kurireu ure maku etaiwu bakaru jiwu meardure nou Jesus bataruji. Jor-duware Jesus mako pemegare nou saduceu doge ewadaru jipagi duji. Mare meardaere tunarawo Jesusji jamedu. Akore: – Kakojiwu Pao Kurireu

---

§ 12:26 12.26 Awu bataru padure Êxodo 3.6 keje.

bataru pemegareu remawu jiba pamode pager-  
agu?

<sup>29-30</sup> Jesus akore: - Ere pobe. Boetojiwu bataru kurireu ure aino: "Pao Kurireu ure mitotu je. Tameardu kurido Pao Kurireuji taraga tabo, tameardae pemegareu tabo, tarore jiboe jamedu boe tabo. Judeu doge eiamedu boe erduwawo awu bataruji rugadu." Ainore Pao Kurireu bataru kurireu boetojiwu ure.\* <sup>31</sup> Pao Kurireu bataru boigoduwu ure aino: "Tameardu kurido tamedagei nono tameardu kuri moga tai dumogadure."† Ia bataru kurireu bokware nono awu bataru pobedu doge emogadure.

<sup>32</sup> Nou jorduware Judeu doge eno bakaru jiwu imedu makore Jesusji pugeje. Akore: - Awadaru ure turugadu. Jorduwareu nure aki. Boe jokodu jire akagoino. Pao Kurireu ure mitotu je. Ia boe umodukare nono umogadure. <sup>33</sup> Boe emeardu kuriwo Pao Kurireuji turaga tabo, tumeardae pemegareu jamedu boe tabo. Boe emeardu kuriwo tumedagei nono tumeardu kuri moga pudui dumogadure. Boe emeartorumode awu Pao Kurireu bataru kurireu boetojiwui dukeje emeartorumode Pao Kurireu bataru jamedu boeji. Boe emode boe egu barogo rogu bito tuwo maku Pao Kurireu ai turo pegareu boe moriče. Emode boe egu barogo rogu kodu kowu tuwo tomeado če Pao Kurireu ai. Mare emeardu kuri-mode Pao Kurireuji rugadu emeardu kurimode tumedagei rugadu. Dure pemegare nou turo boe

---

\* **12:29-30** 12.29-30 Awu bataru padure Deuteronomio 6.4-5 keje. † **12:31** 12.31 Awu bataru padure Levítico 19.18 keje.

egu barogo rogu jitu kori rugadu.

<sup>34</sup> Jesus meardure nou imedu bataruji. Jordure ji jorduware Pao Kurireu bataru jiwu nure ema duji. Dukodire Jesus makore ji pugeje. Akore: – Arduware awo akimijerado Pao Kurireučē. Ča. Ameartorudo ji rugadu.

Nono boe eraga bokware tunarawo Jesusji pugeje. Eraga bokware tuwo Jesus barigu boeto tagoino jiboeji rugadu.

### *Jesus Unarare Boe Dogei Emeardae Bagai*

<sup>35</sup> Jesus ure boe erduwado Pao Kurireu uwai tada. Nono unarare boei. Akore: – Jordure Judeu doge eno bakaru jiwuge ere boe erduwado nou umode boe ekinorudowuji. Eгоре Davi onaregedu moduie ema. Mare erduwa pemegakare Pao Kurireu bataruji <sup>36</sup> Pao Kurireu Uwari ure Pao Kurireu bataru maku Davi ai marigudu. Dukodire Davi akore:

– Pao Kurireu makore nou ikimijera umode boe ekinorudowuji. Akore: “Amugudo woe ikana pemegareu jagwai jii toro imode nou jordu pegare aiwuge etagedudo du ka.”‡

<sup>37</sup> – Tagoino dutabo Davi akore tugimijera nuie nou umode boe ekinorudowučē. Mare Davi onaregedu mode ema jamedu. Ča nuba nou umode boe ekinorudowu ure?

### *Jesus Ure Boe Erduwado Boe Ekimijerage Ero Pegare Jiboeji*

---

‡ **12:36** 12.36 Awu bataru padure Salmo 110.1 keje.

Boe emagare nono tuwipaga tabo Jesus bataruji. <sup>38</sup> Nono Jesus ure erduwado rugadu. Akore: - Tagaiwo pemegado jorduware Judeu doge eno bakaru jiwugei. Etaidure boe emeartoruwo pudui. Ere boe etaiwodo tugudau areia motureu meture pudui duji. Etaidure tuwo boe epogurudo. Etumode ba kurireu ka dukeje etaidure boe emago pemegawo pudui etaidure boe ekimijeragewo pudumi kodi. Dukodire erore aino. <sup>39</sup> Nou jorduware Judeu doge eno bakaru jiwuge etumode Judeu doge ere bato puiwu bai ka dukeje emode tugeragu boe eimijera mugure kejewu iraji tumuguwo keje. Etumode boe ewadae ka dukeje etumode boe eke jeture kejewu ira ka boe etododai togwagewo boetoji. <sup>40</sup> Eragojemode boebo dukeje emago raimode baruto boe emearduwo tagoi tuwadaru motureu jituji. Mare pagatu je. Ekiwogure okoge bokwareuge aremei. Ere nou areme okoge bokwareuge ewai aru epiji. Dukodire Pao Kurireu ro pegamode ei rugadu nou ero pegareu boe moriče.

*Okoge Bokwareu Aredu Ure To Diero Rogu Maku Pao Kurireu Ai*

<sup>41</sup> Jesus ure tumugudo nono Pao Kurireu uwai tada taiwo tabo boei. Ere ia to diero tugu ira jagi tuwo maku Pao Kurireu ai. Oe kurireuge ere ture tuguboe kurido rugadu. <sup>42</sup> Nono ia okoge bokwareudo aredu marenaru aregodure. Nou okoge bokwareudo ure to diero tori rogu pobedu tugu nou ira jagi. Ure nono um centavo mogadure. <sup>43</sup> Nono Jesus makore nou ture



jorduwadowugei. Akore: - Iwo tawie boe remawuji. Awu marenaru aredu okoge bokwareudo ure to diero jamedu boe maku dukodire ure to diero makudu kurido nou oe kurireuge eiamedu boe ekori. <sup>44</sup> Mare diero kurireu ji karega inagoino. Nou oe kurireuge ere to diero kurido Pao Kurireu ai mare etaidukare jiwu kobo rogure ere maku. Eno diero kurire ebo kimo. Mare awu aredu ure to diero rugadu maku. Dujire inagoino.

## 13

### *Jesus Akore Pao Kurireu Uwai Akedumoduie*

<sup>1</sup> Nono Jesus ure tudawuje Pao Kurireu uwai piji ture jorduwadowugebo. Ia akore: - Ikimijera. Akaiwodo. Awu Pao Kurireu uwai moture rugadu, rakare jamedu.

<sup>2</sup> Mare Jesus makore nou ture jorduwadowugei. Akore: - Awu tardure jiwu bai rakare, moture. Mare ro pegareuge emode nou tardure jiwu bai kurireu butudo rugadu. Tori tabore pawobe ere towuje marigudu. Mare ia meri keje nou tori jamedu boe epadumodukare puaoji pugeje.

### *Jesus Ure Ewie Nuba Boe Mode Boei*

<sup>3</sup> Jesus uture Oliveira Ri ao ka. Mugu jaekare Pao Kurireu uwai piji. Jesus ure tumugudo nono. Pedro, Tiago, João, André eiamedu boe etaregodure Jesus ae. Ia boe edukare nono ebo. Nono enarare Jesusji. <sup>4</sup> Eгоре: - Kaba meri kejeba Pao Kurireu uwai butumode, nou akagoino jiboe jetumode puidi kuri aino na?

Kaba jiba čerdumode čerduwawo nou akagoino jiboe jetumode pudui kuri aino duji?

<sup>5</sup> Jesus makore ei. Akore: – Taeku jado boe ekawo taekiripagado. <sup>6</sup> Boe emagamode tuwadaru pegareu tabo. Egomode umode boe ekinorudowu nuie pudumi. Mare pagare egoino. Mare du inodu tabo emode boe ekiripagado rugadu. <sup>7</sup> Tameardumode bakaru pegareuji. Boe emode tawie boe erugoduie pui tuwaiga tabo. Boe erugodu akedukaie. Boe egomode nou torowu boe ekorigoduie dukodie erugodu kurie pui rugadu. Mare taragado tai tamoramagadukawo. Pao Kurireu jorduware ro pegareuge erugoduji marigudu. Umodukare nou erugodu tawuje epiji. Erugodumode pui tuwaiga tabo rugadu mare moto akedumodukare raga. <sup>8</sup> Boe eimijera kurireuge erugodumode pui tugobaigaregebo. Boe eke bokwamode boe jamedu boe parugajeje. Dukodire boe ewimode tuge boei koia. Moto magadugodumode boe jamedu boe parugajeje jamedu. Awu inagoino jiwu iwadaru jetumode pudui dukeje tarduwamode moto akedumode kuri aino duji nono aredu kurijirigodu mogadure. Aredu kurijirigodure dukeje boe erduware kuri butumode kuri aino duji. Mare aredu kurijirigodu ji karega inagoino. Boe pegamode motoji nono iwadaru mogadure dukeje tarduwamode moto akedumode kuri aino duji. Dujire inagoino. <sup>9</sup> Taeku jado. Boe emode tugeragu tai. Emode tadugu baičoreuto. Etaiwomode ia taro pegare jiboe bagai. Emode boeto tai Judeu doge ere bato puiwu bai tada. Tameartorure i kodire boe

eimijera kurireuge emagomode tawagai. Dukejere tamagodo iwadaru pemegareuji ewadaru jipagi. <sup>10</sup> Boe eiamedu boe emeardumode iwu bakaru pemegareuji moto jamedu boe parugajeje dukeje moto akedumode. <sup>11</sup> Boe emode tadugu baičoreuto. Emagomode tai ia taro pegareu bagai. Mare tamororamagadukaba tamagore jiboe bagai. Tamagomode mare tawadaru karega. Pao Kurireu Uwari umode tuwadaru maku tagai tamagowo ewadaru jipagi. <sup>12</sup> Boe emode tuwiamage emagu boe eimijerage pegareuge etai ewidoduwo. Boe emode tore emagu boe eimijerage pegareuge etai ewidoduwo. Boe etore emode tuo tuje emagu boe eimijerage pegareuge etai ewidoduwo. <sup>13</sup> Tameartorumode i kodire boe eiamedu boe erdu pegamode tai. Mare tamodukare tagera ra tameartorure i dupiji kodire imode taginorudo rugadu.

### *Judeu Doge Erdu Pegamode Jiboe Reo*

<sup>14</sup> Jesus makore kimo. Akore: - Tardumode nou Pao Kurireu jordu pegare jiboeji Pao Kurireu uwai tada dukeje tarduwamode boe pegamode kuri aino duji.\* Tardumode nou inoduji kodire inagoino tai. Boe erdumode awu bataru padure kejewu baperaji rugadu. Mare boe erdumode nou Pao Kurireu jordu pegare jiboeji Pao Kurireu uwai tada dukeje Judéia moto kejewuge eregodu rakamode toro tori ao ka tuwo tuginorudo boe pegareu piji. <sup>15</sup> Nou rakojere tuwai aogejewuge eregoduwo tuwai piji toro tori ao ka. Ekawo

---

\* **13:14** 13.14 Awu bataru padure Daniel 9.27, 11.31, 12.11 keje.

turemo tuwaito iaboe bagai. Etuwo tugera kedo tabo. <sup>16</sup> Nou maragodure to boepa jiwuge eregoduwo nou to boepa piji toro nou tori ao ka jamedu. Ekawo tugirimi tuwai ka ia tugudau areia bagai. <sup>17</sup> Nou Pao Kurireu jordu pegare jiboe rakojemode Pao Kurireu uwai tada dukeje boe pegamode boei rugadu. Dukodire inagoino boei eregoduwo rugadu toro tori ao ka. Nou meriji boe pegamode kuiarureugei rugadu. Boe pegamode ei rugadu eroiwakare turegodu rakawo dukodi. Boe pegamode etore kugure etuje magei jamedu eroiwakare ture rakawo dukodi. <sup>18</sup> Tamagodo baruto Pao Kurireu bagai biaku butukawo boei nou eregodure jiwu meri keje. <sup>19</sup> Boe pegamode boei rugadu boe pega jamedu boe kori. Pao Kurireu ure moto to dupiji boe erdukare awu boe pegareu boeji jii aino. Mare boe pegamode motoji rugadu. <sup>20</sup> Nou boe pegamode kejewu meri makamode. Mare Pao Kurireu umode nou merido biagatu je pugeje. Nou boe pegamode kejewu meri makamode rugadu dukeje boe eiamedu boe ewimode rugadu. Mare Pao Kurireu umode nou boe pegamode kejewu merido biagatu je tuwo meartorure puduiwuge edo činorudo. <sup>21</sup> Mare boe pegamode kejewu meri aregodumode dukeje boe egomode: "Umode boe ekinorudowu aregodu. Ema reo!" Ainore boe egomode. Mare tawia-pagakaba ewadaruji. Pagare egoino. <sup>22</sup> Mare paga karega inagoino. Boe etaregodumode rugadu nou tuwadaru tabo rugadu. Egomode umode boe ekinorudowu nuie pudumi. Mare pagare egoino. Egomode tumagoie Pao Kurireu

bataruji mare pagare egoino. Ero rakamode boe emeartoruwo pudui Pao Kurireu piji pagatu je. Emodukare meartorure Pao Kurireu jiwuge remawuge ekiripagado. Mare etaidumode tuwo meartorure Pao Kurireu jiwuge ekiripagado nou turo rakareu tabo rugadu. <sup>23</sup> Dukodi čare taeku jado. Pagare eroino tai. Tameartorukaba ei. Ire tawie boe jamedu boeji marigudu.

### *Imedu Onaregedu Aregodumode Pugeje*

<sup>24</sup> – Boe pegare moto jiboe akedumode dukeje meri joku akedumode jamedu. Ari joku akedumode jamedu. <sup>25</sup> Kuieje doge ewudumode baru piji jamedu. Baru magadugodumode rugadu.† <sup>26</sup> Dukejere čare boe erdumode Imedu Onaregedu aregodumode tugodu tabo boetugu aojitu duji. Erdumode Imedu Onaregedu ro rakareuji. Erdumode Imedu Onaregedu o jorugu kurireuji. Jorugure moto jamedu boe parugajeje. <sup>27</sup> Umode Pao Kurireu utugarege baru tadawuge etudo tododai Pao Kurireu ure tugeragu jiwuge ewagai moto jamedu boe parugajeje. Emode edo tudo pui.

### *Figo I Umode Boe Erduwado*

<sup>28</sup> Jesus mako kimore. Akore: – Figo i ure tarduwado tu tu je. Figo i okurogu boture dukeje tarduware bubutumode kuri je rugadu. Tagaiwore figo iji tarduwawo bubutumode kejewu meriji. Ainore tarore tu tu je. <sup>29</sup> Ča ire tawie nuba boemode meri jokuji nuba boemode ari jokuji. Iwo tawie. Tagaiwodo awu

---

† **13:25** 13.25 Awu bataru padure Isaiás 13.10, 34.4 keje.

ire tawie jiboe jamedu boeji emode tarduwado dubagai. Tardumode ire tawie jiwu iwadaru jetumode pudui duji dukeje tarduwamode boe puredugodure itaregoduwo iwo boe jamedu boe akedudo. Mare bubutu ji karega inagoino. Nou itaregodumode jiwu meri jire inagoino. <sup>30</sup> Iwo tawie boe remawuji. Toro ia meri keje ia tawobe erdumode awu imagore jiboe jeture pudui duji rugadu. Jetumode pudui rugadu tuwimodedu otodai. <sup>31</sup> Baru akedumode. Moto akedumode jamedu. Mare iwadaru akedumodukare jii toro rugadu. Jetumode pudui rugadu.

### *Boe Erduwakare Jesus Aregodumode Kejewu Meriji*

<sup>32</sup> Nono Jesus mako kimore. Akore: – Boe erduwakare nou meriji rugadu. Boe erduwakare kaiba meri jetumode awu iwadaru jetuwo pudui. Pao Kurireu utugarege baru tadawuge erduwakare. Pao Kurireu Onaregedu jorduwakare. Tu Pao Kurireu jorduware tu rugadu. <sup>33</sup> Tarduwakare itaregodumode kejewu meriji. Dukodire tado tarugadu. Tagaiwodo itaregodumode dubagai. <sup>34</sup> Iromode nono ia imedu ro mogadure. Utu jaere tugiriaduwo. Ure tudugarege etu pemegado tuwaiji. Ure emaragoda maku etai. Ure ia tudugare rakojeddo bai poro keje. Makore nou tudugareji jetu pemegawo nou bai poroji tubaga tabo tuwagai. <sup>35</sup> Iromode nono nou imedu ro mogadure. Dukodire inagoino tai taeku jaewo. Tarduwakare kaba meri kejeba itaregodumode. Itaregodumode

boečoji rakudu, meriji rakudu, baburedugodutabo rakudu, čaboečoto rakudu, merirekodutabo rakudu. Tarduwakare. <sup>36</sup> Dukodire tado tarugadu tabaga tabo iwagai. Itaregodumode tači je. Itaidukare iorduwo tai tameartorukare i dutabo. <sup>37</sup> Dukodi inagoino tai. Inagoino boe eiamedu boei. Tado tarugadu tabaga tabo iwagai.

## 14

### *Boe Eimijerage Ere Tumeardae Tawuje Tuwo Jesus Bito*

<sup>1</sup> Merimode pobe dukeje Judeu doge emode tuwadae Páscoa towuje. Nou ewadae kejure emode ia tuge amireu tuginaiwu kowuje. Fermento metukare nou amireu tada. Čare nou ure Judeu doge enomea maku Pao Kurireu aiwuge eimijerage etaidure tuwo tugeragu Jesusji tuwo bito. Nou jorduware Judeu doge eno bakaru jiwuge etaidure tuwo Jesus bito jamedu. Mare etaidukare boe erduwawo nou tumeardae pegareuji. <sup>2</sup> Emagore pui. Eгоре: – Pamode pageragu Jesusji nou Judeu doge ewadae keje dukeje boe ekorigodumode pai rugadu. Emode bato pui turo pegawo pai. Dukodire paromodukare aino ewadae keje.

### *Jesus Uture Boe Eda Betânia Ka*

<sup>3</sup> Jesus rakojure boe eda Betânia keje Simão uwai tada. Nou Simão iere Biri Pegareu jamedu. Jesus mugure nono nou bai tada ira keje togwage tabo. Nono ia aredu aregodure Jesus ae poari rogu tabo. Boe ere nou poari towuje tori tabo.

Nou tori iere alabastro. Roreboe mori kurireu meture nou poari rogu tada. Boe ere nou roreboe towuje nardo tabo. Nono ča nou aredu ure nou poari rogu jado. Ure nou roreboe redo Jesus aora joki. <sup>4-5</sup> Boe erdure nou aredu roino duji dukeje iage emago pegare nou aredu roino Jesus jituji. Egore: – Awu aredu ro pegare. Ure nou roreboe barigu. Nou roreboe mori kurire rugadu. Boe emaragodumode jii joru akedu ka tuwo tugeragu nou diero kurireuji tuwo akirodo nou roreboeji. Kočare ukare nou roreboe maku diero bagai tuwo diero kurido tuwo maku marenarue doge etai?

Nono emago pegare nou areduji. <sup>6</sup> Mare Jesus makore nou boei. Akore: – Tagaba awu aredu pogurudo rore iduji. Rore i du moture Pao Kurireu jakai. Mare paga karega. <sup>7</sup> Marenarue doge edumode tagabo jii toro rugadu. Tagaidumode taro pemegawo ei dukeje taro pemegado ei tagaidure jiwu meri keje. Mare imire itumode tabiji rugadu. <sup>8</sup> Awu aredu jorduware nou inoduji dukodire ure nou roreboe redo iogi tuwo iwiri udo turugadu ituguduwo mototo iwi keje. <sup>9</sup> Ča iwo tawie boe remawuji. Awu aredu rore iboe akedumodukare boe etaora piji jii toro rugadu. Boe etumode moto jamedu boe parugajeje tuwo boe erduwado emeartoruwo i iwo ekinorudo dukeje ereadodumode awu aredu rore iduji boe eiamedu boe ewiagai. Dukodire boe ewiagodumodukare awu aredu piji rugadu jii toro rugadu.

*Judas Iscariotes Akore Tumoduie Jesus Maku*



### *Boe Eimijerage Pegareuge Etai*

<sup>10</sup> Nou Jesus ure jorduwadowu Judas Iscariotes uture toro nou ure Judeu doge enomea maku Pao Kurireu aiwuge eimijerage etae. Judas Iscariotes makore ei tumoduie Jesus maku etai. <sup>11</sup> Egarere nou Judas Iscariotes makore pudui boeji rugadu. Dukodire egore tumoduie diero maku ai. Du nou meri pijire nou Judas Iscariotes aiwore Jesus roro jiboeji tuiorduwo tumode Jesus maku boe eimijerage pegareuge etaiwu meri bagai.

### *Jesus Okwagemode Páscoa Kejewu Boe Ekeji Ture Jorduwadowugebo*

<sup>12</sup> Páscoa meri boetojiwu aregodure dukeje Judeu doge ere tagu carneiro doge kugure ewido tuwo tuge pemegado nono turo mogadure tuwaduwo Páscoaji. Nou meriji nou Jesus ure jorduwadowuge enarare Jesusji. Egore: – Kaiba čemode page pemegado pawo kowuje, pawaduwo Páscoaji?

<sup>13</sup> Nono Jesus ure tugeragu imei. Ere pobe. Ure jorduwadowuge nure emage. Makore ei. Akore: – Tadudo toro ba kurireu ka. Tagaregodumode toro dukeje ia imedu aregodumode tadogi ia pori po tabo. Tadudo nou imedu rekodaji. <sup>14</sup> Umode turemo ia baito dukeje tanarado nou uwaire bai čewuji ia paedumodewu bagai. Tagagodo aino: “Pagimijera aidure ia tumugumodewu bagai togwagewo Páscoa kejewu boe ekeji ture jorduwadowugebo nou boe edureu tada.” <sup>15</sup> Tamagomode aino dukeje nou uwaire bai čewu umode tardudo ia boe edu tadawu bai pemegareuji. Nou bai

pemegamode rugadu pagwagewo Páscoa kejewu pageji. Nonore tamode page pemegado.

<sup>16</sup> Nou Jesus ure jorduwadowuge pobedu doge eture nou ba kurireu ka. Erdure nou boeji nono Jesus akoino jiboeji. Nono ere tuge pemegado tuwaduwo Páscoaji nou bai tada rugadu. <sup>17</sup> Nou boečoji Jesus aregodure nouia ture jorduwadowugebo nou bai ka nou ime pobedu doge etae. Dukodire enodo padure doze nono Jesus apo. <sup>18</sup> Emugure nono ira keje togwage tabo rugadu. Dukeje Jesus makore ei. Akore: – Iwo tawie boe remawuji. Tagwagere itabo woe mare ia tagi tamode imagu boe eimijerage pegareuge etai.

<sup>19</sup> Nou Jesus ure jorduwadowuge eiamedu boe ekiarigodure. Dukodire enarare Jesusji tu tu puregodaji. Eгоре: – I na akagoino? Imi na?

<sup>20</sup> Jesus akore: – Tare doze. Mare umode tuge amireu pegodo nou carneiro kaguru tabowu emare umode imagu boe ekimijerage pegareuge etai. <sup>21</sup> Marigudu Pao Kurireu ure boe ewie iwimoduie duji. Nou Pao Kurireu bataru padure bapera keje. Aino čare iwimode nou Pao Kurireu meardae koia. Mare boe pegamode rugadu nou ure imagu boe eimijerage pegareuge etai-wuji. Botumodukare dukeje boe pegamodukare ji. Mare boture. Aino čare umode imagu boe eimijerage pegareuge etai dukodire boe pegamode ji rugadu.

### *Jesus Okwagere Ture Jorduwadowugebo*

<sup>22</sup> Ča enogwage kimore. Jesus ure tugeragu tuge amireuji. Imadure Pao Kurireu bagai nou amireu paru tabo. Nono ure nou amireu

kado dukeje ure pedo nou ture jorduwadowugei. Akore: – Tagwagedo awuji. Ikodu reo tawiabu-tuwo iwugeje, irore jiboe keje.

<sup>23</sup> Nono Jesus ure tugeragu vinho kuruji jamedu. Nono imadure Pao Kurireu bagai nou uva kuru paru tabo. Dukejere ure pedo ei jamedu ekuduwo če. <sup>24</sup> Nono Jesus makore ei. Akore: – Ikure nou uva kuru rema. Iku redodumode boe eiamedu boe ero pegareu moriče. Pao Kurireu ure boe ewie marigudu tumoduie turo maiwu maku boe etai tuwo boe ekinorudo. Aino čare iku umode nou Pao Kurireu bataru jetudo pudui rugadu. Nou iku koiare umode meartorure Pao Kurireu jiwuge etawuje tuwobeče tuwo ekinorudo rugadu. <sup>25</sup> Mare iwo tawie. Ikudumodukare awu vinho kuruče pugeje jii toro itaregodumode mato ibagi pugeje du ka. Itaregodumode pugeje dukeje boe eiamedu boe eimijera kurireu mode imi. Nono ikudumode vinho kuru maiwuče tagabo.

<sup>26</sup> Jesus akoino dukeje urare Pao Kurireu bataru tabo nou ture jorduwadowugebo. Nono ere tudawuje nou ba kurireu piji tuduwo toro Oliveira Ri ao ka.

### *Jesus Jorduware Nuba Pedro Akomode*

<sup>27</sup> Jesus makore ture jorduwadowugei. Akore: – Taiamedu boe tamode tagera ra ipiji. Pao Kurireu ure boe ewie marigudu. Nou bataru padure bapera keje. Akore: “Pao Kurireu umode nou jeture boeiwu bito. Nono nou boe eiamedu boe emode taodo nou tugimijera piji nono ovelha

doge ero mogadure.”\* 28 Mare iewodumode pugeje dukeje itumode tagododai toro Galiléia moto ka.

29 Pedro akore: – Nou iage emode tugera ra apiji mare imire iromodukare aino. Imodukare ikera ra apiji rugadu.

30 Jesus makore Pedroji. Akore: – Imode awie boe remawuji. Awu boečoji rugadu akagomode arduwakaie i dumode pobe metia bokware rugadu. Dukeje čare kagariga kudugodumode.

31 Mare Pedro aidukare awu Jesus akoino pudui duji. Akore: – Boro. Iwimode akabo mare imodukare iwadaru udo nono akago mogadure. Imodukare ikera ra apiji rugadu.

Ainore Pedro akore. Nono nouia Jesus ure jor-duwadowuge egore nono Pedro ako mogadure jamedu.

### *Jesus Makore Baruto Pao Kurireu Bagai Getsêmani Moto Keje*

32 Nono Jesus aregodure ture jor-duwad-owugebo ia iguru jetureu ka. Nou iguru iere Getsêmani. Nono Jesus makore nou ture jor-duwadowugei. Akore: – Tamugudo woe. Imagomode baruto Pao Kurireu bagai.

33 Jesus ure tugera Pedroji, Tiagoji, Joãoji. Uture ebo kuri nono. Dukeje kiarigodu rakare. Jordware boe pegamode pudui duji rugadu.

34 Makore nou ture tugera jiwugei. Akore: – Ikiarigodu rakare rugadu. Rakare tuwo iwido rugadu. Ča tadu rugadu woe tamagowo baruto Pao Kurireu bagai.

---

\* 14:27 14.27 Awu bataru padure Zacarias 13.7 keje.

<sup>35</sup> Nono Jesus ure tudaru gu epiji. Nono ure tubu jodo moto keje tumagowo baruto Pao Kurireu bagai. Makore Pao Kurireu bagai boe pegakawo pudui. Makore Pao Kurireu bagai uwo tumeardae mekido. <sup>36</sup> Akore: - Iogwa Kurireu nure aki. Aromode boe jamedu boeji. Boe ero pegamode idu utudo piji. Mare ukawo nono itaidu mogadure. Mare uwo nono akaidu mogadure.

<sup>37</sup> Nono Jesus ure tugirimi nou ture jorduwadowuge ewagai. Mare kočare enudure. Nono Jesus makore Pedro bagai. Akore: - Simão Pedro! Anudure? Amagodo Pao Kurireu bagai itabowu hora uwo mitotu je mare kočare anudure kuri je.

<sup>38</sup> Nono Jesus makore eiamedu boei. Ere pobe metia bokware. Akore: - Tameardae pemegare. Mare taraga bokware. Aino ča tanudukaba pugeje. Tamagodo itabo Pao Kurireu bagai baruto bope ukawo tumeardae pegareu maku tagai taro pegakawo.

<sup>39</sup> Nono Jesus ure tudaru gu epiji pugeje. Nono makore baruto nono tumago mogadure boetoji pugeje. <sup>40</sup> Nono Jesus ure tugirimi nou ture jorduwadowuge etae pugeje. Jordure ei enudu kimore duji. Norire ekuji rugadu dukodire enudure rugadu. Nono erduwakare tumagomode jiboeji pugeje.

<sup>41</sup> Nono Jesus uture epiji pugeje tumagowo baruto pugeje. Dukejere čare ure tugirimi etae pugeje. Nono makore ei. Akore: - Tanudu kimo nure rugadu kana? Urugadu. Aino čare imagudumode boe eimijerage pegareuge etai

kuri aino rugadu. <sup>42</sup> Ča taragojedo. Pugeje. Nou ure imagu boe eimijerage pegareuge etaiwu aregodu. Paduwo togi.

*Boe Ekimijera Pegareuge Ere Tugeragu Jesusji*

<sup>43</sup> Jesus mako kimore dukeje Judas Iscariotes aregodure etae. Jesus ure jorduwardu nure ema. Aregodure boebo. Nou boe etaregodure tariga kurireu tabo. Etaregodure rago tabo. Boe ekimijerage ere nou boe etudo toro Jesus bagai. Nou ure Judeu doge enomea maku Pao Kurireu aiwuge ere nou boe etudo toro Jesus bagai. Jorduware Judeu doge eno bakaru jiwuge ere nou boe etudo toro Jesus bagai. <sup>44</sup> Nou Judas Iscariotes makore nou boei tugimadumoduie Jesus apo, tumoduie togwa to je koduto tuwo nou boe pegareuge erdudo taidure tuwo tugeragu jiwu nure ema duji.

<sup>45</sup> Dukodire Judas Iscariotes uture kuri Jesus ae rugadu. Ukimadure apo rugadu. Akore: – Jorduwareu nure aki.

Nono Judas Iscariotes ure togwa to Jesus je koduto. <sup>46</sup> Nono nou boe pegareuge ere tugeragu Jesusji turaga tabo. <sup>47</sup> Mare ia Jesus ure jorduwardu ure tugeragu tariga kurireuji. Ure ia imedu bija kado. Nou imedu nou ure Judeu doge enomea maku Pao Kurireu aiwuge ekimijera kurireu utugare nure ema. <sup>48</sup> Mare Jesus makore nou boei. Akore: – Ire boe emeardae pegado kana emearorukawo tugimijeragei kana? Ro pegareu karegure imi. Kočare tagaregodure tariga kurireu tabo rago tabo tawo tageragu i nono taro moga ro pegareuge eidu mogadure.

<sup>49</sup> Iragojere tagabo meri jameduji Pao Kurireu uwai tada. Ire boe erduwado nono. Mare tagare tageragu i. Mare aino čare Pao Kurireu bataru jeture pudui rugadu. Tagaregodure tawo tageragu i nono Pao Kurireu bataru mogadure.

<sup>50</sup> Dukodire Jesus ure jorduwadowuge eiamedu boe eregodure Jesus piji.

<sup>51</sup> Nou boe pegareuge eture Jesus apo dukeje ia iparedu uture eregodaji. Dukodire nou boe pegareuge etaidure tuwo tugeragu ji jamedu. Nou iparedu ukudau areiare mitotu je. <sup>52</sup> Mare uture piji tuwo činorudo nou boe pegareuge epiji tuwiri kedo tabo.

### *Jesus Rakojere Judeu Doge Ekimijerage Egorai*

<sup>53</sup> Nou boe ere Jesus reko toro Judeu doge ekimijera kurireu uwai ka. Nou ure Judeu doge enomea maku Pao Kurireu aiwuge ekimijera kurireu nure ema. Nouia Judeu doge ekimijerage edu nono jamedu. Ure Judeu doge enomea maku Pao Kurireu aiwuge ekimijerage nure iage. Jorduware Judeu doge eno bakaru jiwuge nure iage. Boe eimijerage paru towuge nure iage.

<sup>54</sup> Pedro kodu jaere boei tudu tabo Jesus rekodaji boe erdukawo pudui. Nono aregodure nou Judeu doge ekimijera kurireu uwai ka. Nou uwai kejere ure tumugudo nono tugobaigaregebo joru okwai.

<sup>55</sup> Nou bai ja tadare nou ure Judeu doge enomea maku Pao Kurireu aiwuge eimijerage edure. Nou Jerusalém kejewu Judeu doge eimijerage eiamedu boe edure nono jamedu. Eiamedu boe etaiwore ia Jesus ro pegareu bagai. Ewiapagare batrarodureuge ewadaruji taiwo tabo nou Jesus

ro pegareu bagai. Etaidure tuwo Jesus bito. Mare erdukare ia Jesus ro pegareuji. <sup>56</sup>Boe egore Jesus ro pegaie. Mare ewadaru kodukare puregodaji.

<sup>57</sup>Nono ia boe ewadrarodure pugeje Jesus roji.

<sup>58</sup>Egore: – Čemeardure awu imedu bataruji. Akore ime eie Pao Kurireu uwai towuje. Mare tumoduie Pao Kurireu uwai kurireu butudo dukeje merimoduie pobe metia bokware tuwo nou bai rakojedu pugeje. Ia ime karega. Pudumie tumoduie Pao Kurireu uwai rakojedu pugeje.

<sup>59</sup>Mare awu ime ewadaru kodukare puregodaji jamedu.

<sup>60</sup>Nono nou ure Judeu doge enomea maku Pao Kurireu aiwuge eimijera kurireu ure turagojedu. Makore Jesusji. Akore: – Amagomodukare nou ewadaru jipagi kana? Boe rugadu ji kana egoino rugadu?

<sup>61</sup>Mare Jesus makokare boeji. Nono nou ure Judeu doge enomea maku Pao Kurireu aiwuge ekimijera kurireu unarare Jesusji pugeje. Akore: – Umode boe ekinorudowu nure aki? Pao Kurireu Onaregedu nure aki?

<sup>62</sup>Jesus akore: – Imi rugadu. Mare iwo tawie Imedu Onaregedu romode jiboeji. Awu inodu otobiji tardumode i imugure Pao Kurireu ukana pemegareu jagwai duji. Tardumode i ire irawuje baru piji boetugu tabo duji.

<sup>63</sup>Ča nou ure Judeu doge enomea maku Pao Kurireu aiwuge eimijera kurireu ure tugudau areia mega bowuje tugorigodure dukodi. Dukodire makore tumedage boe eimijeragei. Akore: – Ča. Pameardure awu Jesus bataru



pegareuji rugadu. <sup>64</sup> Unure tudo nono Pao Kurireure. Pagare akoino. Mako peganure Pao Kurireuji rugadu. Dukodi čare nuba tamedar-daere? Nuba paromode ji?

Nou boe eimijerage eiamedu boe ere tumear-daedo nono nou boe eimijera kurireu meardae mogadure. Emeartorukare Jesus akoinoduji. Eгоре pagaie akoino. Jesus ro pegaie rugadu. Tumoduie Jesus bito. <sup>65</sup> Nono ere todoguru barigu Jesus joki. Ere areia kogudo Jesus jegajeje. Nono ere boeto Jesusji. Egokodure ji. Eгоре: – Ioguduba roino ai?

Nono nou tugobaigarege ere tugeragu ji pugeje tuwo boeto ji.

### *Pedro Makore Tuiorduwakaie Jesusji*

<sup>66</sup> Pedro rakoje kimore nono nou bawadu keje. Nou ure Judeu doge enomea maku Pao Kurireu aiwuge ekimijera kurireu utugare aredu kodure nono. <sup>67</sup> Nou aredu jordure Pedroji. Pedro mugure nou joru okwai ture tugeru urudo dutabo. Nou aredu aiwore ji. Akore: – Ature Nazaré kejewu Jesus apo jamedu.

<sup>68</sup> Mare Pedro akore: – Boro. Iorduwakare kaba jiba akagoino.

Nono Pedro uture nou bawadu kejewu bai poro ka. Nono ia kagariga kudugodure. <sup>69</sup> Nono nou aredu makore ia boei. Akore: – Jowu imedu ia Jesus ure jorduwadowu nure ema rugadu.

<sup>70</sup> Mare Pedro akore pugeje tuiorduwakaie Jesusji. Ča Pedro rakoje kimore nono ji je. Dukejere ia boe emagore Pedroji pugeje. Eгоре: – Galiléia moto kejewu nure aki nono Jesus

mogadure. Ia Jesus ure jorduwadowu nure aki rugadu.

<sup>71</sup> Mare Pedro mako pegare ei tumago-modukaie boe remawuji dukeje Pao Kurireu uiago boe pegado pudui. Akore: – Iorduwakare nou tagagoino jiwu imeduji rugadu.

<sup>72</sup> Čare rore puku kagariga kudugodure pugeje. Dukodire Pedro biabuture Jesus makore puduiwu tuwadaru keje. Jesus makore Pedroji makomoduie tuiorduwakaie pudui dukeje nou kagariga kudugodumoduie rugadu. Pedro makomoduie tuiorduwakaie Jesusji dumode pobe metia bokware rugadu. Aino ča Pedro biabuture nou Jesus bataru keje rugadu jeture pudui duji rugadu. Dukodire kiarigodure turo pegareuji. Dukodire ragudure.

## 15

### *Pilatos Aiwore Jesus Ro Pegareu Bagai*

<sup>1</sup> Nou barogwato, barogwakododutabo nou Judeu doge enomea makudure aiwuge eimijerage, nouia Judeu doge eimijerage, nou jorduware Judeu doge eno bakaru jiwuge emagore pui tuwo tumeardae tawuje tuwo Jesus bito rugadu. Nono ere Jesus kogudo. Dukejere ere Jesus reko nou boe eimijera governador Pilatos bagai rugadu. <sup>2</sup> Etaregodure Jesus apo Pilatos ae dukeje Pilatos unarare Jesusji. Akore: – Boe rugadu kana? Judeu doge eimijera kurireu nure aki rugadu kana?

Jesus akore: – Uu. Boe jokodu jire akagoino.

<sup>3</sup> Nou ure Judeu doge enomea maku Pao Kurireu aiwuge eimijerage emago pegare Jesus rore jiboeji nou Pilatos biagai. Ewadrarodure Jesus rore jiboeji. <sup>4</sup> Dukodire Pilatos makore Jesusji pugeje. Akore: – Egore aro pegaie. Kočare amagokare boeji ewadaru jipagi.

<sup>5</sup> Mare Jesus makokare boeji pugeje. Dukodire Pilatos jorduwakare nuba turomode Jesusji pugeje.

### *Egore Jesus Bitoduiago Rugadu*

<sup>6</sup> Judeu doge ewadae Páscoa kejere Pilatos ure ia ro pegareu tawuje baičoreu piji Judeu doge eroiaji. Judeu doge emagomode ia ro pegareu ieji dukeje Pilatos umode nou ro pegareu tawuje baičoreu piji utuwo pugeje. <sup>7</sup> Ro pegareuge emagare baičoreu tada nou joruji. Iage ekorigodure pui ba kurireu tada dukodire ere ia imedu bito. Dukodire eragojere nono baičoreu tada. Ia ro pegareu imedu rakoje ebo jamedu. Iere Barrabás. <sup>8</sup> Aino čare boe emagore Pilatoji uwo ia ro pegareu tawuje baičoreu piji utuwo pugeje turoiaji. <sup>9</sup> Dukodire Pilatos makore ei. Akore: – Tagaidure iwo awu Judeu doge eimijera kurireu tawuje baičoreu piji utuwo pugeje?

Jesus jire nou Pilatos akoino. <sup>10</sup> Pilatos jorduware nou ure Judeu doge enomea maku Pao Kurireu aiwuge eimijerage emeardae pegare Jesus jituji. Etaidure boe emeartoruwo tu pudui rugadu. Dukodire etaregodure Jesus apo Pilatos ae boe emeartorukawo Jesusji pugeje. Mare Pilatos jorduware Jesus ro pegareu bokwaie duji.

Dukodire aidure Jesus utuwo pugeje. Aidukare turo pegawo Jesusji.

<sup>11</sup> Mare nou ure Judeu doge enomea maku Pao Kurireu aiwuge eimijerage ere boe ero jodo. Dukodire nou boe emagore Pilatoji uwo ro pegareu imedu Barrabás tawuje baičoreu piji utuwo pugeje. <sup>12</sup> Mare Pilatos makore ei. Akore: – Nuba iromode awu tagagoino Judeu doge eimijera kurireuji?

<sup>13</sup> Nou boe doge ekudugodure. Eгоре: – Nou Jesus bito! Bito ipo padure pugajewu keje!

<sup>14</sup> Pilatos akore: – Kodiba tagagoino? Ro pegareu pa?

Mare ewiapagakare ji. Ere tugudu rakado. Eгоре: – Bito ipo padure pugajewu keje rugadu!

<sup>15</sup> Pilatos aidure tuwo nou boe doge ewudugugo. Dukodire roro nono etaidu mogadure. Ure Barrabás tawuje baičoreu piji utuwo pugeje. Dukejere ure tugobaigarege edo boeto Jesusji tapira biri iku tabo. Nono ure Jesus maku etai ewo bito ipo padure pugajewu keje.

### *Tugobaigarege Egokodure Jesusji*

<sup>16</sup> Tugobaigarege ere tugeragu Jesusji. Ere turemo apo nou tugimijera Pilatos uwaito. Nono emagore nouia tugobaigarege ewagai. Ere bato pui nono Jesus ae. <sup>17</sup> Nono ere ia boe eimijera kurireu ukudau areia motureu tugu Jesusji. Nou areia kaworu dugunure. Ere ia boe eimijera kurireu atadawu towuje. Ere nou atadawudo botoguruče. Dukejere ere tugu Jesus aoto atadawuwo ema. <sup>18</sup> Nono emago pegare Jesusji.

Egore: – Judeu doge eimijera kurireu nure aki. Boe pemegawo ai awikawo jii toro.

Mare tuwudorekeadae tabore egoino Jesusji. <sup>19</sup> Nono ere ipo to Jesus aoraji. Ere todoguru to ji. Ere tubu jodo Jesus jokorai. Ere tuie jodo mototo tuwudorekeadae pegareu tabo. <sup>20</sup> Ere tumago pegareu akedudo dukeje ere nou boe eimijera kurireu ukudau areia motureu tawuje Jesus piji. Ere Jesus ukudau areia tugu ji pugeje. Nono ere tugeragu Jesusji tuduwo apo Jerusalém piji tuwo bito ipo padure pugajewu keje toro ture boe ewidodureu ka.

*Boe Ere Jesus Bu Ipo Padure Pugajewu Keje*

<sup>21</sup> Eture Jesus apo dukeje tugobaigarege ere tugeragu ia imeduji oreduwo nou Jesus bitodumode kejewu ipo tabo. Nou imedu iere Simão. Aregodure ipoguru piji ba kurireu ka. Cirene ba kurireu pijiwu nure ema. Onaregedu imedu iere Alexandre. Ia onaregedu imedu iere Rufo. Tugobaigarege ere tugeragu Simãoji oreduwo nou ipo tabo. <sup>22</sup> Nono eture Jesus apo toro ia tori ao ka. Ewadaru tabo nou tori iere Gólgota. Boe ewadaru tabo iere: “Boe ewireuge etaora ra jeta reo.”

<sup>23</sup> Ere ia jorubo barigu vinho kuruto. Nou jorubo iere mirra. Nono ere nou vinho kuru maku Jesus ai kuduwo če. Mare Jesus aidukare tuguduwo če. <sup>24</sup> Nono tugobaigarege ere Jesus bu ipo padure pugajewu keje. Ere Jesus ukudau areia pedo pui. Ere tuwadumode tabowu tori rogu barigu tuiorduwawo ioguduba umode tugeragu Jesus ukudau areiaji. <sup>25</sup> Meri jeture

toro baru kugajeje dukeje ere bu ipo padure pugajewu keje. <sup>26</sup> Ere atugoreboe bu ipo keje Jesus aora bukajeje. Eгоре: – Judeu doge eimijera kurireu reo.

<sup>27-28</sup> Ere ia ro pegareu ime pobedu doge emugudo nono Jesus apo jamedu nou meriji. Ia rakoјere Jesus kana pemegareu jagwai. Metia rakoјere Jesus kana pegareu jagwai jamedu.

<sup>29</sup> Boe etaregodure nono dukeje ere taora paradudo. Emago pegare Jesusji. Eгоре: – Akagore amoduie Pao Kurireu uwai butudo mare merimoduie pobe metia bokware dukeje amoduie rakoјedo pugeje. <sup>30</sup> Kočare amodukare arawuje nou ipo piji? Ča arawuje. Amodukare akinorudo nou ipo piji rugadu?

<sup>31</sup> Nou ure Judeu doge enomea maku Pao Kurireu aiwuge eimijerage, nou jorduware Judeu doge eno bakaru jiwuge emagore pui tugodakagiriwo Jesusji. Eгоре: – Awu imedu akore tumoduie boe ekinorudo. Mare roiwakare tuwo činorudo. Kočare umodukare boe ekinorudo rugadu. <sup>32</sup> Umode turawuje awu ipo piji dukeje pameartorumode ji. Kočare umode boe ekinorudowu karegure ema pugeje. Israel doge eimijera kurireu karegure ema rugadu.

Nou ro pegareuge epadure ipo keje Jesus apowuge emago pegare Jesusji nou boe eimijera pegareugebo jamedu.

### *Jesus Bire*

<sup>33</sup> Meri aregodure pagaia ka dukeje boečodure moto jamedu boe parugajeje. Boečodure rugadu. Nou boečo kodure kuri toro nou trêš hora

ka. Nou trêš hora otobiji baru aregodure nono tumogadure pugeje. <sup>34</sup> Dukeje čare Jesus makore tugudu tabo tuwadaru tabo. Akore: - Eloí. Eloí. Lemá sabactani?

Boe ewadaru tabore akore: - Pao Kurireu. Pao Kurireu. Kodiba are akera ra ipiji?\*

<sup>35</sup> Boe emeardure nou Jesus bataruji dukeje egore: - Tawiapagado. Jesus kudugodure Elias bagai.

<sup>36</sup> Ia imedu rekodure ia esponja tabo. Ure nou esponja pegodo vinho kuru tabo. Nono aregodure tabo Jesus ae. Ure nou esponja kogudo ipo oto tabo. Nono ure nou esponja raido nou ipo tabo toro Jesus okwa ka. Akore: - Pabagamode Elias bagai uwo Jesus rawuje nou ipo piji.

<sup>37</sup> Nono Jesus kudugodu rakare tugiarigodure dukodi dukeje bire. <sup>38</sup> Nou areia kurireu bararere Pao Kurireu uwai ja tadawu ure tuwowuje nou bai ja oto piji moto ka jamedu. <sup>39</sup> Ia tugobaigarege eimijera rakoje puredure nou Jesus padure kejewu ipoji. Jordure Jesus bire duji. Akore: - Boe rugadu. Pao Kurireu onaregedu nure ema rugadu.

<sup>40</sup> Areme eragojere nono jamedu. Etaiwu jaere Jesus ae. Iarodo iere Maria Magdalena. Metago iere Salomé. Ia etumedago iere Maria jamedu. Nou Maria ore ime ere pobe. Ia iere Tiago. Umana iere José. <sup>41</sup> Jesus rakoje kimore Galiléia moto keje dutabo nou areme emeartורה ji. Aino eragojere nou Jesus bireu

---

\* **15:34** 15.34 Awu Jesus makore jiboe padure Salmo 22.1 keje.

keje. Ia areme etaregodure Jerusalém piji turagojewe nono jamedu.

### *Boe Ere Jesus Tugu Tori Poroto*

<sup>42-43</sup> Merirekodutabo José aregodure. Ari-matéia ba kurireu kejewu nure ema. Boe eimijera nure ema jamedu. Boe etaidure ji. Emeartorure ji. Nou José upagare Pao Kurireu bagai boe eiamedu boe eimijerawo ema. Aino čare Jesus bire sexta feira meri keje. Dukodire José uture boe eimijera Pilatos bagai tumagowo ji. Pogurukare tumagowo ji. Aidure tuwo Jesus tugu mototo. <sup>44-45</sup> Pilatos okeare Jesus bire kuri aino duji. Makore tugobaigarege eimijera bagai tunarawo ji Jesus bagai. Nou tugobaigarege eimijera akore Jesus bie rugadu. Nono Pilatos akore: - Kočare Jesus bire kuri je.

Nono Pilatos makore Joseji uwo tugeragu Jesusji uwo tugu mototo. <sup>46</sup> Nono José ure akirodo ia boe ekudau areia motureuji. Uture tabo bireu Jesus ae. Ure Jesus rawuje nou ipo piji. Ure Jesus upodo nou areia tabo. Nono ure Jesus tugu ia tori poro maiwuto nono Judeu doge ero mogadure. Ere nou tori porodo tuwo ia bireuge etugu nono. Mare ekare ia bireuge etugu nou tori poroto raga. Ča José ure Jesus tugu nou tori poroto dukeje ure ia tori kurireu bu nou tori poro je keje tuwo miwuje. <sup>47</sup> Areme eku kidure rore aino duji. Iarodo iere Maria Madalena. Metago iere Maria. José uče nure ema. Emagere erduware kaiba Jesus padure.



# 16

## *Jesus Jewodure Pugeje*

<sup>1</sup> Sábado boečoji nou areme ere tudawuje tuwo akirodo roreboeji tuwo reko Jesus biri joki. Iarodo iere Maria Madalena. Metago iere Maria. Tiago uče nure ema. Metago iere Salomé.

<sup>2</sup> Domingo meriji, ča boečoto eture nou tori poro ka. <sup>3-4</sup> Epuredugodure dukeje emagore pui. Egore: – Nuba paromode pawo nou tori poro jado? Tori kurireu padure nou tori poro je keje. Paragakare pawo nou tori kurireu tawuje nou tori poro piji.

Etaregodure dukeje etaiwore mare nou tori kurireu padukare nou tori poro je keje pugeje.

<sup>5</sup> Dukodire ere turemo nou tori poroto rugadu. Nono erdure ia ipareduji. Mugure nono nou tori poro ja tada. Ukudau areia kigadu maere ji rugadu. Dukodire čare epagudugodure nou ipareduče.

<sup>6</sup> Nou iparedu makore ei. Akore: – Tabagudukaba. Iorduware kaba багаiba taroino taemaru tabo. Tagaiwonure Nazaré pijiwu bitodureu Jesus bagai. Ča rakojekare woe pugeje. Tagaiwodo padure kejewu toriji. Jewodure pugeje.

<sup>7</sup> Tadudo pugeje toro Jesus ure jorduwadowuge ewagai, Pedro bagai jamedu. Tawo ewie Jesus utumoduie etododai Galiléia moto ka. Torore boe erdumoduie pudui. Ure ewie marigudu erdumoduie pudui toro.

<sup>8</sup> Nono nou areme eregodure nou tori poro piji tubagudu koia. Emororamagadure nou

tuordure jiboeji rugadu. Dukodire emagokare boeji boe ewiagai.

### *Jesus Ure Maria Madalena Jordudo Pudui*

<sup>9</sup> Domingo meriji ča boečoto Jesus jewodure pugeje. Nono ure Maria Madalena jordudo pudui. Marigudu ure nou bope doge etuwaire ewarigu nou Maria Madalena piji. Nou bope doge etuwaire enodo padure sete. <sup>10</sup> Aino čare ure Maria Madalena jordudo pudui dukeje Maria Madalena uture nou Jesus ure jorduwadowuge etae tuwo ewie tuordure Jesus jituji. Emage edure tuwai keje tragudu tabo tugiarigodu tabo. <sup>11</sup> Maria Madalena ure ewie. Akore: - Jesus jewodure pugeje. Iordure ji rugadu.

Mare emeartorukare Maria Madalena makore jiboeji.

### *Jesus Ure Ime Pobedu Doge Erdudo Pudui*

<sup>12</sup> Ia ime pobedu doge eture tuwai piji ipoguru ka. Jesus ure jorduwadowuge nure emage. Nono Jesus ure erdudo pudui. <sup>13</sup> Dukodi čare ere tugirimi nouia Jesus ure jorduwadowuge ewagai tuwo ewie tuordure Jesus jituji. Mare emeartorukare nou ime pobedu doge egoino jiboeji.

### *Jesus Ure Ture Jorduwadowuge Eiamedu Boe Erdudo Pudui*

<sup>14</sup> Dukeje čare Jesus ure ture jorduwadowuge eiamedu boe erdudo pudui. Enodo padure onze. Enogwagere dukeje Jesus aregodure etae. Mako rakare ei. Emeartorukare nouia tumedage ewadaruji. Nou emedage erdure Jesusji dukeje

ere tumedage ewie mare emeartorukare. Dukodire Jesus mako rakare ei. <sup>15</sup> Dukodi čare makore ei pugeje. Akore: – Tadudo moto jamedu boe parugajeje tawo boe eiamedu boe ewie iwadaru pemegareuji. <sup>16</sup> Imode meartorure iwuge eiamedu boe ekinorudo. Emeartorumode i dukeje etao pegododumode dukeje imode ekinorudo. Mare meartorukare iwuge imode ewarigu boe pegareuto. <sup>17</sup> Imode meartorure iwuge ero rakado. Emode bope doge etuwairé etawuje boe epiji. Mare turaga tabo karega. Ikie tabore imeardae tabore eroino. Emagomode boe tuginaiwuge ewadaruji jamedu. Boe erdumode eroino duji dukeje erduwamode iragojere ebo duji. <sup>18</sup> Emode tugeragu awagei mare boe pegamodukare ei. Ekudumode jorubo pegareučé mare boe pegamodukare ei. Emode tugera bu kogodureuge ewugeje dukeje nou kogodureuge epemegagodumode jamedu.

### *Jesus Ruture Baruto*

<sup>19</sup> Jesus ure tumago akedudo nou ture jorduwadowugei dukeje ruture baruto. Aregodure toro baruto dukeje mugure Pao Kurireu kana pemegareu jagwai. Aino Pagimijera kurireu nure ema rugadu. <sup>20</sup> Nou Jesus ure jorduwadowuge emagore Jesus bataru pemegareuji boe eiamedu boe ewiagai moto jamedu boe parugajeje. Pagimijera Jesus ure ero rakado. Dukodi čare boe erduware boe jokodu jirabodu boe egoino.

**Pao Kurireu Bataru Kurireu; O Novo  
Testamento**  
**Borôro: Pao Kurireu Bataru Kurireu; O Novo  
Testamento (New Testament)**

copyright © 2020 Wycliffe Bible Translators, Inc.

Language: Borôro

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 21 Feb 2024 from source  
files dated 30 Dec 2021

05073d81-df10-56a3-8756-3f5d99c40c1e